

光緒江西通志

江西通志卷一百七十八

仙釋一

上古

洪崖先生得道居西山洪崖或曰卽黃帝之臣伶倫也堯時已三千歲漢武帝時有衛度世者入華山尋父叔卿見父絕壑中與數人博戲問爲誰曰洪崖先生許由巢父也隋開皇中以洪崖所在改郡爲洪州今西山中伏虎山北巖右有洪井井上有石壇壇北里許有五春臼壇南二里有鸞岡相傳爲先生煉丹搗藥及乘鸞憩息故址

豫章書 謹案隋置洪州因洪崖井爲名見元和郡縣志水經潁水注云潁水西行二十里曰

散原山西北五六里有洪井舊說洪崖先生之井也西有鸞岡洪崖先生乘鸞所憩泊也雷次宗云此乃繫風捕影之論據實本所未詳聊記奇聞以廣井魚之聽又引謝莊遊豫章觀井賦詩言鸞岡四周有水謂之鸞坡

似非虛論舊志據豫章書以為居西山洪崖又以洪崖所在改洪州於前未聞蓋以神仙之說荒遠難稽元之又元姑弗深考耳

周

蕭史配秦穆公女弄玉夫婦跨鶴於蕭壇峯上昇安志謹

案水經注鷺岡西有鶴嶺王子喬控鶴所經過也有二崖號曰大蕭小蕭言蕭史所遊萃處也舊志紀跨鶴上昇亦見南昌府志同為附會似以水經注所稱為近理也王子喬事別紀

漢

梅福九江壽春人嘗官南昌尉旋歸九江屢上封事後

棄妻子去世遂以福為仙今豐城縣盛山亦有甘露臺

梅仙館朝斗壇丹井宋元豐五年封壽春真人紹興六

年加吏隱二冊俱存名勝志

葛生隱新吳山孫策據江東太史慈問以休咎握手不

語而去迹其處虎豹環側不可近及大帝權建吳國方
知握手之兆云

安志

晉至隋

吳猛字世雲豫章人幼以孝聞夏月不驅蚊蚋恐其去
已而噬親也年四十遇異人丁義復師南海太守鮑靚
得祕法雲符晉武帝時同旌陽謁謚母受孝道明王之
法謚告猛云吾見玉皇元譜許爲高明大使領仙籍君
元都御史也還豫章江以白羽扇畫水而渡一日暴風
起乃書符擲於屋上有青鳥銜去須臾風止人問之答
曰南湖舟中有二道士呼救故以此拯之爾尋訪果然
西安令干慶死已三日猛曰未合死當爲上天訟之遂
臥尸旁數日與慶同起慶弟寶感其事爲撰搜神記旌

陽得仙猛亦於西平乘白鹿車與弟子四人冲虛而去
 干慶好獵猛極諫不聽一日大獵引火烘天而猛坐草
 中鳥獸依附火不能及所居有仙壇今為吳仙觀宋封
 神烈真人安志謹案晉書本傳猛豫章人舊志作新
 書又干寶作搜神記乃感父婢再生此以再生屬寶之
 兄本傳猛為庾亮迎至江州問疾辭以算盡死其尸
 此云與旌陽同時冲虛而去亦異聞也太平御覽六百
 六十三引述異記晉咸康中江州刺史庾亮迎吳猛將
 弟子登廬山過石梁見一翁坐桂樹下以玉杯承甘露
 與猛猛分賜弟子又進一處崇臺廣厦金玉房宇器物
 不可識與猛言若故舊設玉膏終日舊志於仙釋旁及
 錢鏐劉綱而不及此翁於猛傳亦不之及未知其旨今
 附紀之

許遜字敬之世居許昌祖炎父肅避地南昌因家焉吳
 赤烏二年己未遜生少從吳猛傳三清法要晉太康初
 為旌陽令大施利濟尋棄官謁謚母於丹陽授以道術

煉丹於艾之黃龍山得寶劍梅山之下登水東小峯築

壇醮星焉永嘉末海昏有巨蛇噓氣喻人石噬甚眾乃

仗劍行斬之後於豫章遇一美少年與語遽告去謂弟

子曰此老蛟精也試迹其所之化黃牛臥砂磧命弟子

施岑揮劍中其左股奔入城西井從長沙井出尋滅之

慮豫章為浮州蛟龍所穴因於牙城南井鑄為鐵柱下

施八索鉤鎖地脈又周行江湖諸郡殄滅毒害乃歸舊

隱於甯康二年八月一日拔宅上昇十二真人傳於八月望日四十二人

拔宅昇天宋封神功妙濟真君豫章書謹案劉義慶幽明錄許遜別傳真仙通鑑引西

山十二真君傳稱遜少孤躬耕負薪養母敬事寡嫂為

旌陽令誠吏胥去貪鄙除煩細脫囚繫痊金縣圖使囚

者得之以償負免枉桎梏植竹水中為民愈疾又著八訓

曰忠孝廉謹寬裕容忍舊志第紀神異不復詳及朱樂

彭伉字武陽蘭陵人仕晉爲尙書左丞密修仙術永康
中棄官事許遜遜妻以長女永和二年八月十五日全

家二十六人白日上昇

仙苑
編珠

施岑字大玉

仙苑編珠作施
峯小字道乙

沛郡人徙居九江雄偉多

力弓劒絕倫遜每出使與甘戰執劒從侍甯康初御蒼

龍乘雲而去今西山至德觀卽岑眺蛟臺

志

甘戰字伯武豐城人有孝行從許遜遊異其材器凡與

文祕訣悉命掌之斬蛟斬蛇無不與焉及遜昇仙戰歸

豐城布德行惠鄉人感之陳大建元年正月七日乘彩

麟之車上昇宋封精行真人靖安縣西北丹仙觀爲戰

故宅豐城縣南白鶴觀是戰得道處飛昇日有風簞一

枝墜地復生每因風而嘯韻若管絃後人於其地建飛

望觀

名勝志

盱烈字道微豫章人少事母孝慕許遜道結草宅旁遂得聞道要母常采花以奉遜遜飛昇日母子相隨騰雲而去今壇井尙存

號盱母井

宋封烈爲和靖真人又云盱母

乃遜長姊遜嘗築室於宅旁俾烈母子居之

豫章書

鍾離嘉字公陽

仙苑編珠作鍾嘉字本超

南昌人其母許遜妹也少

孤性簡澹遜喜其有受道資乃教以神方後隨遜冲舉今新建丹陵觀是其故址

安志

時荷字道陽四明山道士遜旣得仙荷持龍節前驅雲路

仙苑編珠

周廣字惠常事許遜執僮僕禮元康中執麾幢前引遜

歸舊宅

仙苑編珠

陳勛字孝舉慕許遜道託爲旌陽縣吏因得師遜爲入

室弟子遜拔宅日執羽旌導於前

仙苑編珠

曾亨字國興孫登常指云此人骨秀可學昇天遂事許

遜從遜車駕同昇

仙苑編珠

羅文佑南昌人父塘與許遜學道晉太康中文佑奉母

湛之歛采藥黃山結廬長春里丹成乘白狼去

府志

董晉字混成武甯人素業治兄弟三人從許遜治蛟二

兄遇害晉益感憤遜授以祕法遂精道術卒助遜周行

郡邑驅孽至邑西龍潭殲之鄉人就其故居立白馬廟

祀焉

府志

許大遜僕也本干姓與妻市米於西嶺聞遜將飛昇奔馳而歸倉黃覆其車遺米於地米皆復生人名其鎮爲

生米鎮遜以許未應得仙乃授以地仙之術夫妻俱隱

西山

安志

文斤南昌人號超然子晉咸安中爲高平令遇異人授

以丹訣棄官歸甯康二年仙去

安志

劉道成新吳人仕晉爲陳州刺史乞歸居縣西文明坊

修黃老之術皈依大羅真符永嘉二年合宅冲舉梁武

帝卽其故趾勑昭德觀

名勝志

曹德休從東海青嶼山來遊江西以符藥救人疾有狀
訴其女爲邪物所魅休曰汝居近潭穴汝女爲蛟所窺
已拘攝精魂在其穴俾投符潭中霹靂忽作少頃浮一
物長二丈餘已劈裂死凡求藥者以江魚爲膾并美酒
饗之病自痊一日語人曰我欲入西山但今年牛疫當

甚留我姓名遇疫時書字貼牛角自當無患後果驗

謹案十代文獻略注云德休西晉太史後梁尚書得不死之藥謝志誤載入明今改定

劉懿真東晉時女冠已五六百歲嘗東遊謁母嶺建壇

葛陽山之麓後白日冲舉今靖安縣有劉仙觀

安志

萬振字長生南昌人齊梁閒嘗以符呪治祟疾隋文帝

賜號天師詔洪崖山爲觀以居之唐時漁者得青石長

七尺扣之有聲郡以獻於朝碎之得二劍鐔上刻振姓

名高祖歎異召見曜日殿龍朔初尸解啟棺惟一劍一

杖詔以銅函葬劍杖於西山天寶洞之側

安志

瞿夫人洪州黃元仙妻也隋末元仙棄官遂同隱羅山

貧甚爲人傭織以養其姑如此者十年一日忽謂元仙

曰昨聞帝命當與汝別俄頃化爲青氣數丈騰空而去

志安

陶安公新吳人混迹爲陶師嘗治鐵爐煙成紫蓋有朱雀集而鳴曰安公安公道與天通七月七日迎汝以赤龍及期龍至安公跨而去二女修其術亦得仙唐天寶中名其居爲陶仙觀

安志 謹案安公仙傳作太安鐔治

唐

吳彩鸞猛女也唐太和末書生文簫寓紫極宮一日遊西山與彩鸞相遇因約俱歸簫貧不自給鸞寫孫愐唐韻日得一部鸞可五緡金盡復寫如是者十載稍爲人知乃潛往新吳越王山各跨一虎陟峯巒而去

豫章書

張氲晉州人號洪崖子隱姑射洞中元宗召見於湛露殿問曰先生善嘯可得聞乎卽應聲而發聲若鸞鳳拜

官不受還山絕粒服氣洪州大疫有狂道士賣藥得者
卽愈元宗曰必氲也三召不赴天寶末忽大霧尸解張
說有洪崖子張氲傳一卷名勝志

李元基武德初隱建昌葛山

今屬靖安縣

以符藥救人探虎

骨鍼鵲影活魚鼈甚眾夜露宿野草中代宗末插松柏
滿身飛去後有人採藥葛山見元基跨青鹿行若飛莫
知所之安志

胡慧超遇日月二君授以淨明忠孝之道唐初隱西山
洪井偶過城隅見有舉家悲泣者問之曰廟神歲擇女
爲配吾女明日當行是以悲爾慧超卽驅風雷焚擊妖
廟并燎秦時巨樟卽其地創信果觀元宗聞而召見作
詩送之還山後化去謚曰洞真祀之元妙觀安志

錢明字內光南昌人讀書西山以五經登科文宗時爲
南安副都護遷光祿卿尋隱廬山得補腦還元之法後
吳越王錢鏐迎至臨安師事之久之還簡寂觀雲孫數
人各以明經爲縣宰首已皓白一日語家人曰上清召
我俄而氣絕舉棺尸解去蓋百七十歲云

安志

伊用昌唐末被羽褐往來江右縱酒狂逸皆稱爲伊風
子妻年少而有殊色善音律女紅用昌作望江南詞夫
婦倡和而歌夜宿古寺廢廟天祐閒至南城夫婦食牛
肉俱死鎮將丁某爲藁葬路旁一年後丁某將抵鍾陵
於北市棚下見之登旗亭共飲丁大醉睡去風子題壁
云此生生在此生前何事從元不復元已在淮南雞犬
後而今便到玉皇前題畢夫婦連臂高唱出城渡江至

遊帷觀又題真君殿後七言律詩一首其尾自銜云定

億兆萬恆沙軍國主南方赤龍神王自後不復見

豫章書

章全素南昌人吳郡有蔣生者好神仙遊荆門見有行乞者憐其困憊因命執侍左右徵其家對曰章氏子全素其名家於南昌年荒流徙荆江聞幸君子憐而容焉於是隨歸四明忽一日謂生曰先生學煉丹能化几上石硯爲金乎生曰爾傭者豈知神仙事全素笑而退後月餘於衣中出一瓢甚小顧謂曰此中有丹能化石成金願得石硯以一刀圭傳其上生以爲誕怒訐之明日全素卒以簣覆屍將命棺而埋於野撒簣屍已亡去徒存衣履生大異後見藥鼎中有光探之得石硯其上寸餘化爲紫金透裏皆黃光始悟真仙不識大慚恚云

宣室

志

陳師不知何許人衣服藍縷至豫章寓梅氏待之甚厚
一日忽曰吾明日當設齋求新盃二十事及七飭君亦
宜來會可於天寶洞前訪陳師也梅與之持盃渡江而
去梅如約至洞前忽得一小徑甚明淨尋之見一院有
青童應門入見衣冠華楚延之坐食至乃熟蒸一嬰兒
梅懼不食良久又進一蒸犬子亦不食道士歎息命取
昨所得盃還之視之乃金盃也謂梅曰子善人然不得
仙千歲人參枸杞皆不肯食分也謝而遣歸

安志

法達豐城人專虔誦法華嘗禮六祖頭不至地祖訶之
問蘊習何事曰念法華經祖曰怪汝心中負此一物達
因請說經義祖令朗誦至方便品祖曰止此經元來以

因緣出世爲宗汝當信佛知見只汝自心達曰但得解
不勞誦邪祖曰口誦心行卽是轉經口誦心不行卽是
被經轉因說偈云心迷法華轉心悟轉法華誦經久不
明與義作讐家無念念卽正有念念成邪有無俱不計
長御白牛車達遂契旨

景德傳
錄

道一漢州什邡人姓馬氏故稱馬祖得法於南嶽懷讓
自建陽佛迹嶺遷臨川次至南康龔公山大厯四年開
道場於鍾陵開元寺洪州廉使問曰喫酒肉是不喫酒
肉是答曰若喫是中丞祿不喫是中丞福龐居士蘊賞
參道一日不與萬法爲侶者是甚麼人道一日待汝一
口吸盡西江水卽向汝道居士大悟遂廁門徒焉貞元
四年二月一日沐浴跏趺而逝元和二年賜諡大寂禪

師塔曰大莊嚴之塔

景德傳
錄

懷海福建長樂王氏子卅歲離塵三學該練依馬祖與
西堂智藏南泉普願同號入室時三大士化門相角立
焉拈立叢林儀軌名曰清規元和九年示寂諡大智禪
師塔曰大寶勝輪

傳錄

亮座主蜀人好講經論一日至開元寺參馬祖祖與之
詰辨遂大悟禮謝曰某所講經論將謂無人及得今被
大師一問生平功課消釋盡矣遂往西山終身不出
天然初業儒將應舉長安遇禪者於逆旅禪者問曰仁
者何往曰選官去禪者曰選官何如選佛曰選佛當往
何所禪者曰今江西馬大師出世是選佛場也乃直造
江西見馬祖祖曰南嶽石頭是汝師也遂抵石頭執爨

役三年忽一日石頭告眾曰明日剡佛前庭草及期大眾各備鋤鑿剡草天然獨以盆水洗頭跪石頭前乃爲薙落爲說戒遂掩耳趨出再謁馬祖入僧堂坐聖僧頸祖曰吾子天然卽拜馬祖謝師賜與法號因名天然也壽八十三示寂於鄧州丹霞諡智通禪師

稽古錄

常興住泐潭南泉至見師面壁泉乃拊師背師問汝是阿誰曰普願師曰如何曰也尋常師曰汝何多事師爲

六祖下第三世

指月錄

法會六祖下第三世嗣馬祖住靖安石門山泐潭寺法會問馬祖如何是祖師西來意馬祖終不言法會默悟

繞法堂一匝而去

指月錄

水潦和尚洪州人問馬祖如何是西來意祖曰禮拜著

纔禮拜祖忽當胸踏倒遂大悟拊掌曰也大奇百千三
昧無量妙義祇向一毛頭上識得根源去住每告眾曰
自從一喫馬師踏直到如今笑不休

指月錄

希運闍人幼出家於黃檗山額間隆起如珠後遊天台
逢一僧言笑如舊相識乃偕行屬瀾水暴漲捐笠植杖
而止其僧率師同渡師曰兄要渡自渡彼卽褰裳若履
平地回顧曰渡來渡來師曰咄這自了漢早知當斫汝
脛僧笑曰真大乘法器言訖不見至洛京行乞忽一嫗
出棘扉間曰太無厭生師曰汝未施資無厭何邪嫗笑
而掩扉師異之進與語嫗曰可往南昌見馬大師至南
昌馬已示寂乃往石門謁塔參百丈師後觀察裴休迎
住龍興寺日夕問道贈師詩曰自從大士傳心印額有

圓光七尺身挂錫十年棲蜀水浮盃今日渡漳濱一千
龍象隨高步萬里香花結勝因擬欲事師爲弟子不知
將法付何人大中閒示寂諡斷際禪師塔曰廣業豫章

賓侍者住新吳金相寺嘗誦心經度一亡婦婦一夕見
夢其子曰吾藉賓侍者力已得度矣賓後將脫化及期
刺史臨之見頂閒火炎炎發更攬筆製一偈曰天地沈
吟乾坤拍塞笑殺阿難驚動彌勒擲筆火熱頭顱化後
遺有舍利子數十顆安志

令超初住高安上藍山後至洪州開元寺諡元貞大師

安志

嚴陽尊者名善信初結庵於嚴陽山至天祐閒居明心
寺據坐蟠石嘗有二虎一蛇馴繞左右及入滅建塔寺

中宋淳熙時啟塔髮垂至踵指甲過臂

名勝志

宋

周貫號木雁子短褐不完乞錢卽沈醉嘗著華陽三編
秘袖之人欲訪其道輒侵以惡語宋熙甯初在洪州石
頭有張生見之邀酒食醉臥中夜聞車馬聲起視之貫
死矣四體柔紫如生平及張歸其弟迎語之曰周生過
我云今往雙嶺矣

安志

王迪熙甯中人爲洪州司理民有爭訟枉直立辨臺司
表其政方召用卽挂冠隱西山緱嶺跨鶴歷諸峯繼而
去劉純父送以詩云髮如抹漆左參軍脫卻青衫作隱
淪世上更無羈縶事壺中卻有自由身鼎烹玉兔山前
藥花看金鰲背上春莫怪少年能決烈益田夫婦總全

真世以姓同子喬而跨鶴又同因以洛中緱山名西山

鶴嶺

寒夜錄

張道清字得一郢州人熙甯閒入九宮山修道光宗寢疾道清奉詔治以符水卽愈賜號真穆真人爲建欽天瑞慶宮開禧中金兵過武甯道清端坐繩牀取曳之弗能舉叢矢環射悉倒卻兵益憤縱火焚庵薪盡焰熄眾大驚散去後蛻化至今蹟猶存

府志

傅得一鐵柱宮道士兒時入山遇弈者啖以果後往來新淦蹤迹狂詭嘗深夜臥深雪中鼻息如雷皆稱爲傅顛朱文公贈以詩曰到處逢人說傅顛相看知是幾生前直移北斗傾天漢去作龍宮第二仙又大書曰雲庵涓熙初召對德壽內殿賜號靈寶大師

安志

包真人遇異人授以至道且屬曰麻峯洞天汝得道飛
昇之地也至進賢麻姑觀遂居之自稱包道者與白玉
蟾會龍井上論金丹火符真人貽以詩有待吾了卻凡
閒事然後相從面紫羅之句嘗照水以泥塑像謂觀主
曰類我否曰然歲旱命羣兒迎取龍泉水浥之雨沛至
一夕觀中異香襲人天樂作觀主驚異起視真人已騰
雲而去後遇旱迎真人像以龍井水浥之卽雨府志
章自然武甯人生宋景定壬戌好仙術居太平山用丹
藥濟人尸解後繞身異香三日不息敕封廣惠真人今

祀其肉身於太平宮

府志

楊介如字固卿豐城人開禧閒道士住清江相堂觀有
諸文士集觀中唱酬介如蓬垢側坐句至朗吟曰酒量

春吞海詩肩夜聳山坐皆驚服後入閤阜山卒著隱居

詩集府志

洪州老兵姓名不傳唐時郎中臧論道知洪州老兵爲園子能致非時果菜異而問之言得於市使他人求之終不得察之惟子身臥草舍往往夜定有語笑聲及迫近則又寂然論道每從容撫接久之老兵告曰今夜三鼓漏點中半公能獨步至圃中當有一言相授苟少差違則成虛矣論道是夕不寐夜分具袍笏將出其妻不測而彊制之漏向盡亟趨草舍老兵已死使人瘞之屍如輕泡論道歎恨彌日

能改齋漫錄

劉玉字頤真隨父徙居洪州遇胡洞真張洪崖授以秘術許旌陽親降其家授以中黃大道八極真詮五十二

歲化去三年啟窆視之爲空函人稱爲劉玉真

安志謹案劉

玉爲黃元吉之師生於宋寶祐丁巳見道遙山志元吉以元英宗至治三年遊京師明年泰定改元卒見虞集撰黃中黃墓誌銘徐慧則元吉弟子也舊志以劉玉黃元吉徐慧三人列於胡慧超之後誤爲唐人今以劉玉改置宋末黃徐概入元代

超慧字誨機住甯州黃龍寺聚徒行化凡所酬答迴出

尋常初師遊嶽麓曾會神僧謂曰去東北行遇洪卽止

逢龍可住及至黃龍山山上有雙峯庵主曰馬和尚一

見歡若夙契遂付法後以庵付師而去久之禪侶雲集

黃龍一派被滿天下

名勝志

慧南住黃龍寺初依泐潭澄禪師分座接物名振諸方

偶同雲峯悅遊西山夜話雲門法道峯曰澄公雖是雲

門之後法道異矣南詰其所以異峯曰雲門如丸轉丹

砂點鐵成金澄公藥汞銀入鍛則流出南怒以枕投之
明日峯謝過又曰雲門氣宇如玉甘死語下乎澄公有
法授人死語也死語其能活人乎卽背去南挽之曰若
如此誰可汝意峯曰子宜一詣石霜南造石霜慈明後
於言下大悟與泐潭相絕嘗發三問學者莫契其旨叢
林目之爲黃龍三關

安志

祖心傳誨機之教於慧南住黃龍寺名其方丈曰晦堂
人呼爲晦堂叟一日黃山谷來謁祖心舉論語吾無隱
乎爾請公詮釋而至於再晦堂不然其說公怒形於色
時當暑退涼生秋香滿院晦堂曰聞木樨香乎公曰聞
晦堂曰吾無隱乎爾公欣然領解禮謝王韶在熙河多
殺人晚知洪州學佛見晦堂問曰昔未聞道罪障固多

今聞道矣罪障滅乎曰今有人貧時負債富時還否詔曰必還曰然則雖開道矣奈債主不肯相饒何詔愴然後於元符庚辰示寂謚寶閣禪師

傳錄

悟新韶州王氏子至黃龍寺謁晦堂談辨無所抵晦堂患之曰住住說食豈能飽人悟新竊曰望指箇安樂處晦堂曰一塵飛而翳天一芥墜而覆地安樂處正忌上座許多骨董直須死卻無量劫來偷心乃可爾一日聞知事捶行者雷忽震卽大悟因自號死心叟師生有紫肉幕左肩右袒如僧伽黎狀依佛陀院祝髮進具後嗣晦堂政和乙未示寂茶毗舍利五色後有過其區者獲之尤多塔於方丈之北

稽古錄

惟清武甯陳氏子入黃龍寺師晦堂遂嗣法席每謂人

曰諸方所說非不美麗要之如趙昌畫花花雖偏真非真花爾自號靈源叟黃山谷寄詩云騎驢覓驢真可笑以馬喻馬亦成癡一天月色爲誰好二老風流只自知

安志

法忠四明姚氏子嘗參佛眼遠禪師一日縱步水磨觀其榜下曰法輪常轉豁然大悟宣和閒湘潭大旱忠入水呼龍曰業畜當雨一尺雨隨至居南嶽每跨虎出遊儒釋望塵而拜住勝業南木雲蓋公安大瀉五刹復赴豫章黃龍紹興己巳太尉邢孝揚爲忠營壽塔於寺東之薌源工纔畢忠書偈瞑目而寂嗣佛眼遠遠嗣五祖演演嗣白雲端端嗣楊岐會會嗣慈明圓臨濟派也嗣忠之法者普庵肅禪師等

普鑑錄

倚遇漳州林氏子謁浮山遠遠指謂人曰此後學行腳
樣子也既謁衡嶽谷泉三至三逐謁北禪師事最久後
在雙嶺開法龍圖徐禧與師爲布衣交師化前一日以
偈遺之曰今年七十七出行須擇日昨夜問龜哥報道
明朝吉徐見偈因要靈源叟馳往師舉杖曰且道這箇
付阿誰徐與靈源皆屏息擲拄杖投牀枕臂而化指月錄
可真住西山翠巖寺號爲真點胸嘗參慈明言下大悟
自後爽氣逸出機辨迅捷叢林憚之將入滅示疾甚勞
苦席藁於地轉側不少休詰侍者垂泣曰生平訶佛罵
祖今何爲乃爾熟視訶曰汝亦作此見解邪卽起呼侍
者焚香俄頃煙起示寂指月錄

保甯璣道者元祐閒住翠巖寺張商英漕江西絕江訪

之璣逆於塗張問曰如何是翠巖境對曰門近洪崖千尺井石橋分水繞松杉乃笑而長哦曰野僧迎客下煙嵐試問如何是翠巖門近洪崖千尺井石橋分水繞松杉遂題於妙高臺有石刻存焉

安志

善權字異中靖安人姓高習禪定能詩與東溪癩可叟齊名徐俯跋其詩軸云異中下筆豪俊峻峭余每誦之輒能興起有真隱集傳世黃庭堅爲之序呂居仁敘江

西詩派圖二十五人權居其一

府志

文悅南昌徐氏子七歲剃髮於龍興寺年十九參大愚芝禪師初令爲眾乞飯繼令爲眾營炭及募炭歸時維那闕職芝曰佛法不怕爛卻堂司一職今以煩汝師有難色但自念勤勞日久何得中止適架上桶簾爆斷墜

地乃大悟急著伽黎至寢室芝曰維那且喜大事了畢
師再拜服勤八年而芝歿後南昌請住翠峯又遷雲峯
嘉祐七年升坐說偈而逝闍維五色舍利塔於禹谿北
師嗣大愚守芝芝嗣汾陽善昭昭嗣首山念禪師僧寶錄
清涼新建鄧氏子依洪崖法智年二十一祝髮受具時
武泉常寶峯月雲居舜道壓叢林涼往來三老閒皆蒙
器許而疑終未破乃謁黃龍南公容爲入室言論久卽
令坐於旁爲侍者七年南公沒住西山惠嚴院與翠巖
侍者慕詰竝爲海內宗仰

安志

元

桂心淵撫州人爲紫極宮道士醉便臥地號桂風子虞
集察其有異禮遇之初宮寮有宴臘會心淵一遇飲啖

無算或乘酒罵詈人不能堪遂各自爲會心淵幻在各
席溷撓眾始異之俄而舉手謝眾跨一虎而去後隱廬

山

安志

黃元吉字希文豐城人年十二師玉隆宮王月航授以
旌陽清淨之道後遇劉玉真盡得其教人稱中黃先生
一日語陳天和曰今夜子時吾還玉真之虛矣明日用
火淨吾骨有風自南來者吾報汝也已而果然

安志

徐慧字子奇豐城人家於廬陵幼師中黃次參藍真人
究元旨賜號淨明配道格神昭效法師嘗自贊曰生前
我卽汝死後汝卽我於是二中間誰會議真我五月望
日將化云臭皮袋撇了無望礙烈燄火鑪中明月清風
外擲筆端坐而逝鼻流玉筋尺餘

安志

鄔通微道士行止無定嘗醉吟於道多遊豫章或數見其容益壯於前人莫之測一日登市樓飲飛昇去

龍廣寒新建人挾預知之術湖海間咸推爲異人又行服氣導引之法常佩小龜十數於身至晚仍解飼之事母孝六月一日母生辰方舉觴北窗梅花一枝盛開眾稱爲孝梅至治初卒年百有餘歲

府志

左克明鐵柱宮道士輯古樂府溯流窮源妙契作者之

旨

江城名蹟記

大訢南昌人誨機問曰黃龍向泐潭得旨領徒游方及見慈明氣索汗下過在甚麼處訢云千年桃核裏覓甚舊時仁出世吳興烏回遷鳳山天竺博通經典旁及儒家道流之說元文宗以潛龍之舊建龍翔大集慶寺召

訢住持授以大中大夫主寺事奉敕校正德輝重編之
百丈清規著有四會語錄蒲室集自號笑隱至正四年
示寂諡廣智全悟大禪師葬城南撥雲山康僧會塔之
旁得法弟子宗泐字季潭洪武中住持天界

稽古錄

明

黃尊師雙井人涪翁八世孫弱冠爲固始尉患風痺棄
官有神師號金花君曰吾能療汝疾愈當出家諾之乃
以帛黏其膚炳灼之七日起人興國九宮山爲道士主
欽天瑞慶宮其徒千人明太祖西平江漢迎於鄂渚應
對稱旨後召至南京設燕饗之及還曾魯宋濂俱送以

詩靜志居詩話

劉邈邈居江夏武當宮自言南昌梓溪劉氏子楚王府

葛承奉敬事之四川巡撫徐可求過其地從容問某將來祿位得至正卿否徐浙人也因浙語曰奢則不孫徐不喻至四川未數月竟死於土司奢寅之變一日邇過謂葛曰吾將往九峯可爲我治行明日舉手謝曰別矣遂坐解發其篋惟中庸一書斂之如舉空衣

府志

萬尊師名國樞字環中南昌人遊峨眉得盧紫雲五雷祕法崇禎壬申三吳大旱樞在嘉善祈雨雨降道流私語何有雨而無雷樞方持符未及焚雷神就其手掣去震雷繞壇雨大沛又治狐魅握掌默通雷訣須臾羣狐震死

謝志

張還初道士自云洛陽人居南昌與瑞昌王孫朱議霽交霽年少倜儻好結客還初笑謂之曰天下所不易致

者一二人耳其餘皆迎時走集奚求爲崇禎癸未正月
邸鈔傳邊警及畿輔帝坐齋廟鳴鐘召百官踰時方至
則相對噤默無一言霧覽之歎息還初不覺哭失聲明
日還初之江頭覓舟恩恩有行色霧驚問曰師何之曰
將適楚曰奚事還初蹙然曰國家不愛高官厚祿養士
三百年今事迫以患遺君父無一人爲至尊分憂者吾
昨見邸鈔肝膽碎裂楚友有林生者素有大志吾將往
彼勸成一軍從草野倡義勤王爲中國吐氣霧亦泣太
息曰師誠至性人然師別林生久恐復邈漠曠日不支
今旣適楚吾友張若仲負奇略楚之人望吾今爲師通
之左右兩賢事當有濟卽爲具舟裁尺一值左兵偪潯
不及達乃至甯都留再歲丁亥甯都破還初避東江之

僻鄉感疾死耽躬堂遺稿

來復字見心自號竺曇叟豐城人元季航海至鄞止定

水寺洪武初召至京太祖覽其詩褒美賜金襴袈裟授

僧錄司左覺義詔住鳳陽圓通院坐胡黨凌遲死有蒲

庵澹游二集明詩綜謹案舊志來復傳據稽古錄稱

所載見心應制詩有殊域字觸太祖怒賜死事按見心

應制詩載皇明雅頌初無觸怒之事俗語流傳可爲一

笑見心以洪武二十四年死非天奇進賢人父江臺母徐氏年二十禮無說能和尙刺

落教看一歸何處話後得昱首座晝夜樛偈忽不見山

河大地及自身尋患痢甚篤山東靜暉示以大慧果病

背疽因緣遂爾豁然又見寶峯得印證有語錄行世安志

明雪桐城楊氏子九華聚龍庵薙髮往雲棲受具參雲

門澄禪師聞鐘聲大徹後隱贛州之崆峒建安王請住
百丈入院整清規時復荷鍤與作務人俱謂大智再來
也崇禎辛巳三月十九遲明起浴手書偈曰來亦無一
物去亦無一物若知端的意百丈花梢月擲筆而逝

安志

國朝

張逍遙居西山老虎洞時與虎狎初夜臥傾崖下霜雪
覆面盎若春醪之溢久乃結小石屋於古松澗幅巾羽
扇靜坐其中言人休咎皆驗問以金丹不答談明季事
歷歷可聽似曾立朝者卒不自言順治辛丑一夕尸解

去

府志

大雷名本慶順治閒住菩提寺著有五會錄泐潭紀略
淨土吟旅夢草各一卷

安志

等可名行溥俗居新建西山吳原里生時父南淵翁夢
一老僧手拈黃菊笑至其廬翁曰公何來僧曰吾雲堂
貫休也翁覺而志之及重九日等可生生不飲母乳二
三歲不苟葷六七歲便能詩有蜀僧過曰子豈西方來
者邪等卽奪其扇題之有老師問我西來意般若波羅
上大人之句遊方二十餘年後還南昌卓錫古泰定寺

著有棗堂詩集

棗堂
集序

高橋僧不知其姓氏籍里高橋在城南僧日就橋石摩
挲四隅合掌膜拜拜訖巡橋數匝露立不去冬夏一衲
不栗不汗不坐不寢餽之食則食無則已訊之不答如
是三年入廬山獅子巖仍立如高橋時歲餘偶病忽作
偈曰草屨爛斷橫街可惜無人拾得以指畫一大圈大

喝立化去或曰僧崇禎孝廉蜀人也

府志

澹雪臨濟派也康熙丁巳自浙西來見北蘭讓禪師道場鞠為茂草乃結茅其地經營數載殿宇齋堂方丈禪室及秋屏閣列岫亭皆次第重建遂為江西名勝之冠

白志

性音號迦陵瀋陽人深悟圓通見地超越

世宗在潛邸為建西山大覺寺居之及

登極力辭歸隱遂棲廬山隱居寺謹守律規謝絕塵境雖江西

大吏不知為

上舊識也越四年示寂

上深軫恤

特旨褒予追贈國師採其語錄入經藏中

府志以上南昌府塔銘

晉

黃仁覽字紫庭輔之子許遜之壻有道術嘗爲青州從事家在高安每夕取竹杖噉水化龍騎之歸省旦復騎去後舉家上仙里人於其騎杖處立筍竹廟祀之今縣東北二十里祥符觀是其故宅也宋封沖道真君名勝志謝仲初萬載人住高安西北山中卽名謝山方輿紀謂山峯多奇丹竈履迹猶存安志

李八百名常真蜀人自稱年八百歲故人以爲號又傳白鹿先生謂陳搏曰神仙李八百動則八百里二說未詳孰是有葫蘆井煉丹臺在府西三里妙真宮今郡治其故宅也楊誠齋詩李真宅子故依然續仙傳

李明香八百妹也初修道於華林山之元秀峯後於峯

南六十里五龍岡設壇醮祭道成沖舉唐天寶中卽其

地爲元陽觀觀在治西逍遙山今爲妙真觀

名勝志

敖真人失其名上高人縣北三里敖嶺爲得道之所石

壇丹竈劒石存焉

名勝志

丁秀英豫章丁義女也義精於醫嘗以神方授吳猛今

高安調露鄉有白鶴山山下有崇元觀梁太清二年置

爲秀英煉丹之所吳彩鸞嘗就學焉石圃中有丹井秀

英仙去葬衣冠於觀北俗稱丁仙姑塔

玉泉志

唐南唐圻

張惠感字智元高安崇元觀道士武后召爲國師齋於

明堂有慶雲神龍黃鶴之應又奉詔往亳州太清宮祀

九井時冰雪凝沍忽有聲如雷水湧溢二龍出戲后異

之賜帛歸浮雲山煉丹天寶中丹成沖舉

安志

孫智諒高安人幼師惠感煉丹於元秀峯常有浮雲罩

其上因呼浮雲觀開元閒迎至京師年百二十餘矣帝

問何術而壽對曰居山食果飲水而已上歎息送肅明

觀遣內侍送棗二盤再召見內閣時憂旱請夜醮致雨

帝大悅因問治國之要對曰聖人之道在一心不他求

也賜衣帛遣歸至德觀後復徵不起卒年百有四十

安志

沈麟字廷瑞高安人彬之子學道玉笥山嘗衣單褐卽

大風雪不易嗜酒賦詩自號沈道者一日造縣宰戲之

曰沈道者何日道成乎作詩云何須問我道成時紫府

清都自有期手握藥苗人不識體含仙骨俗安知卒後

有人見其乘舟江上歸視其墓已土裂尺餘矣

安志謹案沈

麟安志作字紫庭白謝志因之高安志作字廷瑞王謨
十代文獻略引真仙通鑑亦作字廷瑞謂通志沈麟沈
廷瑞作兩人分入瑞州吉安者誤今攷兩
傳皆稱彬子事迹亦略同爰刪彼存此

幸潭字子淵高安人少有奇氣寡笑言後遇異人授秘

術卒後鄉人遇之於汴寄書語之曰城北潭傍古木吾

家也叩之必應人如其言有二童子出一丈夫繼之宛

如汴中所見郡人異而祠之禱祈輒應或謂其委蛻仙

也白玉蟾遊幸龍王廟作歌五首名勝志

朱元整高安人咸通五年入華林山李八百洞中見玉

案石函內有道經二卷安志謹案朱元整謝志載列
宋代今攷傳文稱咸通年入華

林山乃唐
人也改正

俱胝自婺州金華來結庵府西龍化山開善院傳鐙錄

以俱胝參天龍天龍出一指示得悟名勝志

逍遙山祖李禧肅宗少子也從南陽忠國師出家後居逍遙山賜田甚廣爲建資壽禪寺有真身塔存焉蘇子

由云逍遙峻深帝子道場

樂城集聽禪師塔碑

澄靜亦稱三藏法師俗姓胡高安人得法於大寂宴坐獨龍窟棲息猛虎巖著大乘明教論一卷見性篇一首

安志

通慧駐錫上高焉邨永樂院

舊名康樂

卒咸通二年真身泝

流至高安石頭上屹立不動居人異之爲石塔以葬宋

祥符中僧發視之乃拱立鉅甕中髮垂覆肩迄今祈禱

多應

安志

良价會稽俞氏子幼從師念般若心經至無眼耳鼻舌身意忽以手捫面問師曰何故經言無師異之曰吾非

汝師卽指往五洩山禮默禪師披薙年二十二詣嵩山具戒遊方首謁南泉次參潯山潯復使造雲巖後因過水睹影大悟前旨大中末於新豐山接引後學諸方宗匠咸共推尊之曰曹洞宗匠將圓寂乃命薙髮澡身披衣聲鐘大眾號痛乃延七日端坐長往當咸通十年壽六十三謚悟本禪師六祖下第五世嗣雲巖晟曹洞宗

指月錄

慧禪師洛陽人住黃檗山初業經論因增受菩提戒欲捐身水中以飼鱗甲值禪者策發乃造疏山參仁和尙言下頓悟師示滅塔於本山肉身至今如生六祖下第

七世匡仁法嗣

指月錄

道虔福州侯官人姓劉氏受石霜印記化徒於九峯後

住泐潭而終諡大覺禪師塔曰圓寂

景德傳錄

常觀住五峯道望與九峯虔禪師並稱百丈海法嗣

景德

傳錄

道延洞山第四世時號鹿頭和尚嗣曹山寂

景德傳錄

了然瑞州末山尼也因灌谿閑和尚到曰若相當卽住

不然卽推倒禪牀便入堂內師遣侍者問上座遊山來

爲佛法來谿曰爲佛法來師乃升坐谿上參師問上座

今日離何處曰路口師曰何不蓋卻谿無對始禮拜問

如何是末山師曰不露頂曰如何是末山主師曰非男

女相谿乃喝曰何不變卻師曰不是神不是鬼變箇什

麼谿於是伏膺作園頭三年師高安大愚嗣也

指月錄

法濟筠州黃檗山禪師也行思七世下雲門偃法嗣

景德

傳錄

清稟泉州仙遊人姓李氏幼禮中峯院鴻謐爲師年十六福州太平寺受戒初詣南嶽參惟勁及抵韶陽禮祖塔回造雲門師自此入室印悟乃之金陵國主李氏請居光睦未幾復命澄心堂集諸方語要經十稔迎住洞山開堂青原七世下雲門偃法嗣

傳錄

宋

趙生名吉高安丐者敝衣蓬髮未嘗沐浴洗好飲酒醉輒毆詈人人皆謂之狂不敢近也然與人雖未嘗識皆能道其宿疾及生平喜怒元豐中見蘇轍問曰亦嘗夢先公乎方其夢也亦知有存沒憂樂乎曰是不可常也吉笑曰公問我養性今有夢覺之異則性不全矣轍異之

又曰吾知君好道而不得要陽不降陰不升吾將教君
挽水以漑百骸諸疾可去嘗求書見蘇軾於黃州留半
歲北歸從之興國知軍楊繪留之吉每以禽鳥六畜自
隨寢食同之後爲騾所傷死繪具棺以葬有蜀僧法震
者至雲安逆旅見一丐自言姓趙於黃州識蘇公爲我
謝之以告轍驚問其狀適知興國朱彥博子在坐歸告
其父發棺惟一杖及兩脛在焉道書解之下者留腳一
骨殆是矣

樂城集

王蒙嘗遊上高麻塘市李林家林喜牡丹一日花盛開
曰今歲花好否蒙笑曰看到子孫能幾家後宿永豐觀
道士知爲異人因鑰其戶次早開戶視之不見但見椽
閒題一絕云水須大海龍方隱木是梧桐鳳始棲莫道

男兒無去路碧霄雲外有丹梯自後不復見

安志

王敖道號浪仙入上高白土洞修道嘗題云靈剎倚山
光無塵染洞房雲籠金地暖龍噴玉泉香松竹分幽徑
樓臺聳上方蓬壺人到此僧伴繞迴廊後不知所往

安志

守芝六祖第十一世瑞州大愚山禪師雲峯文悅見芝
公屋老僧殘荒涼如傳舍芝自提笠日走市井暮歸閉
關高枕欲去之芝適上堂曰大家相聚喫莖薑喚作一
莖薑入地獄如箭射下座師駭焉夜入丈室求佛心法
後芝遷翠巖文悅得承心印

僧寶錄

本仁高安白水人師將辭世焚香白眾曰香煙絕處是
吾涅槃時也言訖跏趺而坐息隨煙滅

安志

通元住九峯郢州程氏子初參德山後於洞山言下有

省住後僧問自心他心得相見否師曰自己尙不見他人何可觀問罪福之性如何了達得無同異師曰絺綌不禦寒

安志

克文治儒業弱冠出家得法於黃龍南說法於高安諸山晚居洞山繼悟本价大師辨博無礙徒眾自遠而至有語錄蘇轍爲之序

安志

道全洛陽王氏子生不茹葷事洞山文師五年而悟告文曰吾一槌打透無底藏一切珍寶皆吾有也文印可之高安太守請住石臺清涼徙居黃檗蘇子由來筠與遊甚契謂子由曰君靜而慧可以學道久之化去體煖而香輒茶毘得舍利光潔無算子由爲撰塔銘

安志

省聰蜀綿州王氏子遊吳越事浙西淨慈大本禪師夢

聰吞一世界一薙刀及聰得悟後本乃明言其夢至高
安住真如開善聖壽三道場蘇子由在筠周旋尤密及
子由再來而聰退老黃檗特出山相見曰宿緣也眾又
請居逍遙子由函華嚴諸大部以授踰年而寂

安志

石臺問禪師成都吳氏子手書法華經甚精將誦萬遍
老而不衰子由贈詩有云法老曾經見老廬半生勤苦
一朝虛心通口誦方無礙笑把吳驚細字書

方外志

德洪一名慧洪字覺範號冷齋新昌彭氏子禪學超詣
釋注金剛楞嚴圓覺法華四經博通儒書尤工於詩名
動京輦黃山谷贈以詩稱其韶勝不減秦少游氣爽絕
類徐師川韓子蒼宰分甯館之雲巖寺僧三百各持一
幅紙求詩握筆立就子蒼見之不憚曰詩當少加思洪

笑曰取快吾意而已卒於南安軍所著有合論易傳僧
寶智證傳林閒錄天廚禁癢冷齋夜話甘露集石門文
字禪注十明論證道歌

安志

靚禪師新昌人住筠之三峯嘗渡溪陷於水童子掖至
岸坐沙石閒作詩曰春天一夜雨露霑添得溪流怒氣
多剛把山僧推倒卻不知到海復如何後往泗洲香山
無疾而化

安志

圓至姓姚氏新昌人爲文贍而奧清而奇所著牧潛集
方蛟峯序之比之斬鐵切玉云又注唐詩三體號大隱
禪詩

安志

元

異禪師上高蒙山儒家子弱冠棄俗首參百丈漆桶開

禪師次之荆湘理公祐見藏經腐於蠹魚白主僧盡啟
其函於烈日中暴之未幾雨暴至寺眾怒訴師默祝天
龍守護移時雨歇溝澮皆盈獨暴經處雨未嘗溼眾異
之旋依祐禪師祝髮爲僧見鼓山長老皖山潑禪師數
年深造閩域凝遂付衣鉢後住浙西嘉興府澱山普光
王禪寺名達京師至元辛卯兩詔不起後趺坐而化

府志

以上
瑞州府

晉

易退字楠隱與宜春楊法道慧陳歸真眈相與結廬萍
鄉之九嶷山煉氣朝真朝夕不倦越二十餘年丹成永
嘉九年正月旣望皆凌雲去後人於九嶷祀之宋政和
中有司以聞封真人

安志

鄧表嘗修煉於小仰山又號鄧表峯上有星壇石曰藥

竈名勝志

湯周二仙失其名俱廣南人晉安帝時湯爲青州壽光令周爲洪州南昌令湯以國度不綱慨然挂冠訪周卜地避世於萬載縣西四十里修丹成道因名湯周山山上有碁盤石試劍石二仙遺迹也有鐫刻相傳爲紫薇

觀碑輿地紀勝

唐

黃皮二仙女世傳於萬載邑北黃皮山修真道成白日冲舉鄉人每禱輒應志安

徐仙翁嘗於萍鄉縣西煉藥時有黃犬旋繞丹鼎旁徐異之翌日以紅練繫其頸隨犬所之至桐坡岸側枸杞

叢中隱而不見但餘練在外掘之得枸杞根形若犬持

歸蒸之芬芳滿室食之仙去山有徐仙觀

輿地紀勝

謝通修宜春人居玉笥山清居觀長慶初入郁木坑見

一宅重簷廣廈一青衣童子出迎曰梅蕭二真待子久

矣引入見賜嘉禾二穗松葉半斤令頓食之大中九年

四月七日忽謂門人曰吾昨夜夢洞府有神仙之命吾

將往矣翼日遂解化門人以棺殮之忽失蛻質所在乃

葬空棺於觀之東北隅

真仙通鑑

甄叔懷讓第二世也住楊岐山演法四十餘年元和十

六年歸寂茶毘獲舍利七百粒於東峯建塔

景德傳錄

慧寂韶州懷化人姓葉氏九歲於廣州和安寺投通禪

師出家十四披薙未登具即遊方初謁耽源應真真曰

國師當日傳得圓相九十七箇乃六代祖師所留也授
老僧曰吾滅後三十年南方有沙彌來到大興此教次
第傳授無令斷絕今適子來當以付之師既領元旨後
參潯山遂升堂奧一日忽有梵僧從空而至曰特來東
土禮文殊卻遇小釋迦遂出梵書貝多葉數十與師作
禮乘空而去因號小釋迦梁貞明二年遷東平說偈抱
膝而終明年法嗣光涌遷靈骨歸仰山塔於集雲峯下
敕謚智通禪師妙光之塔嗣潯山祐禪師法道盛化人
皆宗之曰潯仰宗

稽古錄

虛中分宜人與齊己爲詩友住湘西栗城寺嘗寄司空
圖詩云門徑放莎垂往來投刺稀有時開御札特地挂
朝衣嶽信僧傳去天香鶴帶歸他年周召化無復更衰

微圖答詩云十年華嶽峯前住祇得虛中一首詩

指月錄

善道可文法嗣也住木平山師肉髻羅紋金陵李氏嚮其道迎請供養待以師禮異迹頗多沒後謚真寂禪師

塔曰普慧

景德傳燈錄

宋

羅昇宜春人少貧業屠狗晚乃貨藥市中遇異人授以方術年幾百歲忽一日辭親故奄然而逝時政和二年也後有客見昇在瀏陽市貨藥有書寄鄉人歸乃其沒之明日也

明一統志

段璪字德禎萬載人少遊鄉校性醇厚與物無忤建炎間寇盜充斥段氏族屬皆爲寇掠璪齎金帛往贖賊重其義俾與偕歸紹興二十九年歲旱斗米千錢璪發廩

濟之止取常值又爲粥以食饑者全活甚眾後結庵謝
山壁閒多寫坦蕩字忽聚親舊別曰天帝卽召我矣一
日鐘鳴歟然凌空去鄉人走視惟敝衣履存焉

安志

方會宜春冷氏子少警敏不事筆研及出家閱經典輒
自神會折節老宿後受慈印記住楊岐山皇祐改元示
寂塔於雲蓋

指月錄

行偉仰山禪師也受賢首宗於大三藏成名謁南禪師
有省師律已甚嚴燕坐忘夜旦占一室謝絕交遊元豐
三年示寂閣維得五色舍利骨石拴索句連塔於寺之

東

指月錄

法普仁壽人幼不茹葷苦行卓然居仰山四方緇流多
從之宰相張商英聞於朝賜以紫方服後杖錫雲遊久

之復歸思居靜慧室有僧寓其中夜夢神告曰此非汝所覺卽遷別舍明日法普至而居之宣和初召住嶽麓辭不往作頌而終

明一統志

印肅姓余宜春人政和中生太平里生之夕有祥光之異甫六歲夢一僧點其胸曰汝他日自當省師寤以白母母視其點紅瑩大似纓珠遂許祝髮年二十七禮壽隆院賢和尚爲師次參牧庵忠公有省歸壽隆脅不沾席者十二年一日閱華嚴經至李長者達本忘情知心體合論豁然大悟有慈化院建炎初經火迎師興之其以災患疾苦請或書頌或料水與之無不立驗有赴總管府首師妖者巡司奉檄句師師至見一龍乘雲下須臾風濤生屋底白晝晦暝巡司叩龍謝謹具以狀奏府

府李姓者善雷術益信以爲妖遂抵院曰借汝壇場施
我法事行之三日雷無應抱慚辭歸師云將天鼓相送
忽有雷從北方起雷電交作守投誠懺悔乃止師見人
事旁午乃離院潛入南山石巖下靜坐歷三載無有知
者明永樂閒詔封師普庵至善宏仁圓通智慧寂感妙
應慈濟真覺昭貺惠慶護國宣教大德菩薩

安志

善相主袁州開元浴室院有同道人者愛其井泉甘美
時來從相飲久之留墨二丸與相而去湖南轉運李甲
好參訪或語之曰呂洞賓在袁州浴室院有墨寄其主
僧李道過求之相曰有同道人寄墨無呂洞賓也出以
與李蓋黃金云明日回至謂相曰人知我矣遂與俱去

不知所終

虞集學
古錄

德一宜春人九歲出家詣仰山參簡禪師後雲遊四方
禱雨輒應紹興末忽作頌擲筆而逝

明一
統志

元

黃朴庵至正初遊萬載水坑礪愛其山林清勝遂結庵
號長興後跌坐而逝

安志

黃竹關黃伯祥也修真於萬載建城坊之道觀有八人
者假筮以餐既莫知所之他日與邑商邂逅襄陽歸筮
而言曰我八仙也黃亦仙也未幾黃飛昇遂名其觀爲

九仙

安志

徹公寶雲院僧與棲真寺僧月樓皆能詩圭齋雅重之

林志

希陵字西白姓何氏婺之義烏人也年十九落髮於東

陽資壽院受具戒謁虛舟遠依東叟穎皆器重之不以
此自足見雪巖欽公於杭遇諸塗巖舉黃龍見慈明事
問之印其穎達及巖歸大仰而師方遊金山遺書招之
甫至遽請爲第一座巖將示滅拍師肩曰吾以此擔累
汝未幾巖果化去眾請師繼其席後奉朝旨遷浙之徑
山七年而沒賜號大辨禪師塔曰寶華

虞集學
古錄

法琳浴室院僧自幼參學承事雪巖欽禪師與入室之
列孤舟濟在崇勝海印如在慧力虛谷陵在仰山皆嘗
禮之使分坐說法皇慶初元持盃遊旁郡頗以藥石濟
人歸而傾其囊得金若干遂以葺其院後被璽書住持
撫州梅山廣濟禪寺賜號佛慈普濟妙慧禪師

虞集學
古錄

一初分宜福勝寺僧能詩虞集過寺初賦詩云翰苑虞

夫子名聞四海傳偶攜天上月來繫寺前船一見如曾
識三生定有緣不嫌雲臥冷與我共留連

府志

會禪師姓劉宜春人住楊岐山一大蛇嘗受戒或遣去
則不敢少留有縣尉欲以非意加師蛇張口向前尉怖

謝安

志

國朝

鍾引自南嶽來住黃竹坪營寺時有巨蛇蜿蜒長丈餘
盤寺基不動鍾引持杖說偈云住者住去者去好相遇
莫相誤說已蛇去野獸壞其蔬圃一夕虎銜獸至山門
鍾引曰毋傷獸自是獸至虎逐之走而已

府志

寂德泮鄉人陳姓名邦淪有妻子好釋氏言棄家投黃
竹坪鍾引禪師乞削髮鍾引曰無庸居三年遣之歸築

德慧庵更名慧清婦劉氏亦通內典名慧靜終年扃戶
暑月熾炭坐不汗嘗置一竹板出入手中光澤如鏡一
日鍾引至喝之曰摸甚麼言下大悟自是遇事能前知
甲申十二月夫婦俱年八十語婦曰可歸矣明年正月
五日汝先行吾旬日踵至至期婦沒十六日寂德沐浴
端坐而逝

府志

覺圓宜春何氏子幼聰慧通經史諸語錄祝髮廬山開
先寺晚歸宜春卓錫邑西大沙塘之茆庵自豎額曰金
沙改拓寺基鳩工厥土獲窖鏹數千上皆鑄有金沙古
寺字樣師驚異悉以增飾寺宇

府志以
上袁州府

江西通志卷一百七十八

江西通志卷一百七十九

仙釋二

秦

孔邱明秦時與駱法通等十人避亂玉笥山中修煉有素服老人持銅鉢貯小魚十尾授之曰此魚宜善視遂於洞天后鑿池畜之後人呼爲畜龍池九真得道九龍控馭上昇惟何紫霄漫游不與帝命青衣童子齋紫衣玉冊召之紫霄受衣與冊隱居山洞爲地仙何君洞由此名或曰紫霄姓鄧故山谷詩云惟有鄧公畱不去

安志

漢

朱孺子漢末入玉笥山食菊花白日乘雲而去

安志

晉至隋

丁令威豫章人嘗於閭阜山修真得道今山北高峰爲

丁真人壇又名丁仙峯

安志謹案搜神記丁令威遼東人以爲武甯人者始於明一

統志安志作豫章人蓋沿其說

王朔方平裔孫居棲梧山許遜嘗過其家授以修煉之術遜飛昇時遺以香茅一根謂植之久服可以長生今玉虛觀尙有遺種土人又云掘土可得丹盃大小不一

狀

左編

杜曇永號元老有道術梁天監中攜門人司門員外郎錢文詠乘舟載家南上玉笥山初駐清虛館後復構清真宮蕭子雲助錢百萬成之自爲記書之於碑梁武賜號金闕先生後於太白峯頂飛昇

安志

蕭子雲仕梁爲黃門侍郎棄官修道於郁木庭道成天

詔爲元州長史遂仙去

安志

陳大素字靜甫與蜀人羅太冲同見華陰道士王能傳鍊白石法去渡湘水又遇何仙娥教隱浮田乃歸取白石資之化爲霜服之飄然若生羽翰時唐武德二年八月事也今其地爲洞真觀

名勝志

唐

吳雲儲貞觀七年罷廬陵郡歸隱玉笥山全家得道故有廟祀宋政和中賜額

名勝志

李仙女新淦人乾符中黃巢僞境邑人有李姓者舉義兵拒之賊中占候者言新淦有神人生紫氣不可犯也遂去後李氏女果以修行得仙鄉人爲立廟於仙女峯

頂府

志

宋

何得一新淦祥符觀道士宣和閒徽宗夢二道士至殿前問其姓名對曰鄭化基何得一旣寤訪之不得令以諸郡免丁籍稽之得於臨江軍道籍中得一應召至闕賜住太乙宮號沖妙大師補丹林郎遷右街鑒義時道士任州縣者率擾民得一上言道家以清淨無事爲貴不應與州縣事請一切罷之貴近用事者怵言者攻之遂奪職歸今丹林郎誥尙書劄子鄧州禮狀皆藏觀中

名勝志

杜行正字正甫閬阜山道士也工詩善弈尙書謝諤甚禮重之創道院於金華山麓孝宗時賜號沖隱大師府志黃真人失其名長樂鄉茂山人幼時天旱父督之灌水

溉田徐曰無所事此也可將吾家田插標爲記詰朝水
滿禾甦他田皆否鄉人異之合詞請禱遂皆得雨後數
日語其父曰死矣可置我於鼓中仍封以革隨鼓所至
卽我邱壟封定鼓竟奔至仰天岡山上逆行者約七八
里遂不動父卽瘞之至今鄉人猶呼爲轉鼓陵

安志

道振東山永壽空寂禪師也病足忽一日有二士人來
謁貌不凡因受一方名白龍丸使修合之曰不惟愈疾
且可濟眾明年郡城多風疾競求市之得錢數萬因爲
神立廟於東山師道行精卓聞於京師太宗親製問禪
歌三章賜之更賜號空寂大師年九十九

孚惠
廟記

善周慧力寺僧有智慧元祐元年沐浴說偈而逝五日

後鬚髮再生因肉身立塔

安志

海印慧力寺僧相傳水濱石龍蜿蜒鱗甲悉具與慧力寺古刻木龍爲怪師以銅釘釘木龍誦祕典運雷石龍一夕盡碎

安志

德光號拙庵居南山光華寺深明宗旨住景德靈隱淳熙閒四被召對賜號佛照禪師時孝宗目眇外國進千手眼觀音像欲受則納侮正遲疑閒廷臣言可迎至寺中師因舉頌云一手動時千手動一眼觀時千眼觀自是太平無一事何須弄出許多般舉朝大驚上嘉之賞齋甚厚歸老明州阿育山有奏對一編

府志

元

德瑩上高蕭氏子出家禮瑞相寺印宗爲師得法嘗祈雨於雲岑嶺登高臺有應眾請畱靈蹤乃以所焚香布

地遂生木枝葉皆香今臺畔有兜木香焉至元庚辰官
遣海舟河水淺不得出官民祈於師一夕水漲舟出辛
巳九月示寂延祐乙未敕諡行廣通慧妙覺禪師

安志

明

黃明學新喻龍岡人少遊庠序不合入延真觀禮道士
黃建極爲師年四十遇異人授以先天雷法祈禱無不
應洪武丙寅春夏不雨道會江壺天薦於縣令遣書召
焉明學設醮雷雨三日明年丁卯又明年己巳歷庚午
至辛未皆旱俱以明學功民免荒歉後八年己卯旱甚
邑丞王慶具書招之辭不獲已乃更祈請雨應如前因
以七雨道人名焉

安志

鍾山懸號戴陽子早歲出家住北帝觀得內修永樂乙

西遊蜀遇大旱疫蜀王徧訪高士得山懸以六月六日
建醮頃刻大雪蔽空城外甘雨霑足旱疫爲之頓蘇請
於朝封雪谷戶侯後不知所終

安志

傅同元名履道馬步橋簡氏子生而神異長好長生訣
受讀朱子參同契黃庭經客湖湘漢沔間遇神人授以
法并贈以詩結廬千秋嶺時或以道法治人病或以符
呪驅虎蝗或爲鄉人請雨尋居武當山成化十五年京
師旱以薦至京求雨雨足上大喜欲官之辭不受傅文
穆時在尙書亦勸之同元謂曰好道者復好名乎時六
月爲上求雪雪深三尺寒若嚴冬官吏請收之須臾日
出上賜以金劔曰剽妖銀圖書曰秉心端肅送還山賜

號真人

安志

黃半閒慧力寺僧洪武初被召應制賦金陵春曉詩賜
紫金襴袈裟歸其詩云五雲深護鳳凰城海宇清甯旦
氣平錦繡山河霞彩動金銀宮闕日華明御溝垂柳雙
鶯囀官道花飛萬馬鳴試向西虹橋上望分明遐思接

蓬瀛

安志

劉空碧澄真寺僧洪武初召至京師試鍾山曉望詩上
大喜賜玉帶袈裟歸邑人張美和贊余鐸碑記具存府志
雲印天甯寺僧博通經史嘗與梁石門劉山陰彭匏庵

金雪崖爲詩社

府志

國朝

別峯禪師順治辛丑住東平寺時有盜某聚夥欲窘其
法師指寺前一石重千觔曰爾能舉此否眾愕然師乃

以左脅挾石踰山嶺而下輕若鴻毛眾帖服今其石猶

存

府志

不昧愚山寺僧少時不諳文字入山後杜門面壁數十

年忽大悟爲詩文若有神助

府志以
上臨江府

晉

王子瑤字大舉華陰人懷帝永嘉中自玉笥至泰和卽
黃茅岡築壇醮籙感白鶴翔舞事聞賜名白鶴觀給錢
千緡買田贍之後東遊見義山心喜就洞口建壇禮斗
誦黃庭經於是玉女降九鼎丹方修煉四十八年白日

昇天

安志

楊善晉時雲遊至廬陵東山眞常觀適歲旱於東城植
竹爲壇以禱雨大澍遂於山下結茅居焉道成蛻化今

懸崖石上有迹可徵

名勝志

魏華存字賢安任城人司徒魏舒女也少讀老莊春秋三傳五經百子無不該覽慕神仙之術常欲別居閒處父母不許年二十四適太保掾南陽劉幼彥生二子璞瑕及幼彥卒值時荒亂攜二子渡江後瑕爲安成太守華存因修真浮仙觀咸和閒用藏景之法而逝瑕二女爲思微二真人亦煉丹於丹霞觀今丹石猶存風月之夕光彩爛然

安志

盧度字彥章始興人有道術少隨張永北侵魏永敗魏人追急阻淮水不得渡心誓曰若得免死從今不復殺生須臾見兩楫流來接之得渡遂隱居廬陵西昌三顧山鳥獸隨之夜有鹿觸其壁度曰汝壞我壁鹿應聲去

屋前有池養魚皆名呼之次第來取食乃去逆知死年月與親友別永明末以壽終

孫章書

唐 南唐附

匡智長安人貞觀閒棄妻子與姪大郎往廬山修煉居七日有老人曰此山陰地仙不可得南有名山陽地可往居之乃至吉州望見義山忽有樵夫引二人登山曰此山安穩勉力精修遂於送龍洞尾立第二壇朝夕禮斗既數年中元節上帝降仙衣智服之足下雲生上昇而去大郎更立第三壇亦朝夕禮斗次年七月七日尸解事聞敕鄉人祀焉

胡澹庵碑記

蕭靈護字天祐廬陵人自少好道每賑人之急嘗遊嶽麓遇鄧真人授以火鼎黃白之術遂精內學高宗宏道

二年中秋忽語其徒曰吾將往矣是夕尸解

豫章書

蓑衣仙嘗衣蓑衣初詣元妙觀已而來遊清華道士張

天全內之一日呼天全與俱行天全不欲遂辭去歎曰

此人爲青面老子悞一生青面老子謂辛天君也有人

自嶺南來寄書天全乃與天全別同日也

安志

四祖道信大師姓司馬氏隋大業十三載領徒至吉州

值羣盜圍城七旬不解萬眾惶怖師愍之教令念摩訶

般若經時賊望雉堞閒若有神兵乃相謂曰城內必有

異人不可攻矣稍稍引去

景德傳燈錄

宏濟名行思

舊志云姓劉氏安福人

幼出家參曹溪六祖歸住青

原山靜居寺塏曰歸真水旱疾疫祈之輒應

府志

三刀法師姓曹廬陵人出家吉州龍興寺常以竹筒盛

金剛經佩誦之時安史亂吉州刺史劉甯選充行營小將非其好也遂亡捕獲之令斬於朱木橋三刀俱折劉怪問之答以持金剛經問經何在曰被獲時遺墮隨於百步得之竹筒有刀痕而幾絕劉稱歎久之乃縱爲僧奏聞敕號三刀法師

豫章書

應真住吉州眈源山南陽國師慧忠法嗣忠於代宗大厯十年以化緣將畢乃辭帝曰告檀越造取一所無縫塏帝謂塏樣師曰貧道去後有侍者應真知之塏葬於黨子谷詔應真問前語真良久曰聖上會麼曰不會真述偈曰湘之南潭之北中有黃金充一國無影樹下合同船琉璃殿上無知識

傳燈錄

至誠泰和人少於荆南當陽山玉泉寺事神秀秀之徒

眾往往譏南宗曰能大師不識一字有何所長秀曰他
得無師之智深悟上乘吾不如也且吾師五祖親付衣
法豈徒然哉吾不能遠去汝等可往曹溪質疑師遂至
韶陽隨眾參謁不言來處時六祖告眾曰今有盜法之
人潛在此會師出禮具陳其事卽誓依歸乃呈一偈祖
然之尋回玉泉

傳燈錄

無殷福州人姓吳氏七歲依雪峯眞覺出家年滿受戒
遊方抵筠陽謁九峯峯許入室初住禾山大智院學徒
濟濟述垂戒十篇江南李氏召問曰和尚何處來師曰
禾山來曰山在什麼處師曰人來朝鳳闕山嶽不曾移
國主重之命居揚州祥光院復乞入山命師於翠巖上
藍雨院往來闡法號澄源禪師

傳燈錄

南安嚴主姓鄭氏號定光泉州同安人年十一出家建興寺保大元年至廬陵參西峯谿禪師後至泰和懷仁渡值暴漲人曰此江畔高漚潭有蜃出爲民患師乃投偈潭中翌日水退洲起今龍洲是也

名勝志

宋

李思廣字景淵吉水人放意山水閒得錢卽易酒或醉臥市中政和四年來螺川止習谿橋有酒姬頗異之每飲不問其直久益不替一日忽謂姬曰我當別得奉書報謝晨起視則已死體發熱如生召所親葬之後有自衡嶽來者爲景淵致書謝姬郡少年發其冢獨有空棺

安志

徐神翁海陵人崇甯閒來遊安福北真觀忽江漲徐飛

巾水上渡江去

安志

溫受龍泉人得念佛三昧不依師落髮自言吾卽佛母故時人以道者稱之至道元年入傳擔山結茅庵以居撒菜豆粟子於山皆茂結山多虎道者出入不忌或臥於山虎見則坐而守之有時入巖罅中取蓮藕花果遣人雖多亦辦有藍土二行者繼來師事之一日謂鄉老蕭應求曰吾言替人當遠去可來敘別亟視之則長揖趺坐塋中命眾人共封錮之約七日開旣開已失所在獨遺一布巾雙草履應求之弟浩以綱運至陳留市見之笑語如平生附三書與應求及二僧其後藍行者坐化土行者隱葬於石函一月開示之亦不見其處

安志

文悟泰和人姓劉氏自幼不茹葷比長爲念佛善友時

青原信道風鼎盛因落髮師事之暨信順寂徧歷禪會
復還青原住吉水南岡明教典通儒書住六年去之嶽
山得源庵坐定良久乃索紙筆書四頌以辭永豐吉水
泰和三邑道友時紹興四年閑維得舍利極多舌根與
齒不壞叩之作銅鐵聲熟視耿耿有光其徒塔而藏之
有語錄二卷

府志

進英姓劉氏泰和人出家龍安寺悟法於廬山歸宗真
靜禪師得語言三昧佛印禪師名之曰英鐵嘴政和四
年住衡州花藥寺有報恩語錄一卷花藥語錄一卷

安志

集道者泰和真如庵僧也禮互庵爲師有道行一日辭
師遠遊參學至廬山圓通崇勝禪寺悟道每日積柴一
片旣滿室辭眾架柴自焚其身火中出偈云真如集道

者萬緣都放下四方八面任縱橫一輪明月當空挂噫
誰肯當眼觀者所遺舍利立塔尚存

豫章書

齊禪師住吉州青原六祖下十四世石門易嗣也從雲
蓋智禪師出家執事首座後徧參至石門印契示寂日
說偈遺眾曰昨夜三更過急灘灘頭雲霧黑漫漫一條

拄杖爲知己擊破千山與萬山

指月錄

超宗禾山慧方禪師也六祖下第十五世臨濟派也舉
拂子曰看看祇這箇在臨濟則照用齊行在雲門則理
事俱備在曹洞則偏正叶通在潞山則暗機圓合在法
眼則行止惟心若要抵敵生死則霄壤有隔

指月錄

法光姓羅氏泰和人喜爲詩從蘇養直遊祝髮於大潞
空印得法於死心靈源以朝命住嶽麓

安志

蕭禪師永新手力也嘗往慶雲寺夜宿聞鄰壁有相語者云院主明日欲烹我飼蕭手力你自照管莫著鷹鷂狐狸打卻蕭起窺乃一鷲對小鷲作人語耳詰旦寺僧果欲殺鷲因求免乞鷲歸養之後出家得法與鷲同昇

化

安志

止觀能仁寺僧有僧問曰聞師以紙爲罐然乎曰然曰漏了如何曰涓滴不漏打破了如何曰若教打破徧滿

虛空

安志

宗受住能仁寺有二童子嘗來廚中索飯一日師出執饌者怒其亟來弗與二童子跳入井中水爲迸湧眾懼奔告師以木盤掩井跣趺井上坐化水得不湧眾乃知

二童子蓋龍也

豫章書

性空居士姓羅名熙明吉水人少爲蜀商遊峩峩悅之
喜學浮圖道術六十餘喪父母絕葷酒棄家潛姓名入
重慶真武山中子通挾厚貲物色之居士一日謂其徒
曰明旦有遠人來善視之比曉通至號泣請還不答頭
觸地血流被面如是三日不輟居士慰之曰汝第歸某
月日汝已得子所挾物慎無畱此作祟也通誓死不去
則取所畫己像書偈指謂通曰吾非汝父此爲汝父能
生活汝者謹奉持以行遂絕口通不得已長號返舟經
黃陵灘風濤倏起同侶盡溺忽憶居士語抱軸浮水而
得免至家子秀章生訊月日俱驗後居士年九十有二
召山人周良授書二編且曰某日吾歸此編將以相報
其一俟吾孫秀章來與之至期沐浴端坐而逝七日面

如生秀章所得書乃居士語錄其授良者祕不示人咸疑異書云

安志

元

劉洞誠安福人元初學道於武當山道成隱居吉安城西玉泉觀能驅役鬼神使之立見至禱雨治病其應如

響

林志

真火符者元初遊永和市年九十餘雙瞳炯炯夜能蠅頭細書當夜必潔室以水沃地方布席散髮偃臥其上明日地猶溼惟臥處乾竟莫知其終也

林志

劉真人思敬吉之青原人少落魄不羈嗜酒好長生術及長遊蜀中從靈寶陳君受丹砂訣行混元之法徧歷諸名山年五十始入龍虎山爲道士自號真空子尋主

毓和道院鍊鉛汞爲丹砂服之者疾良愈至元十八年
世祖召對稱旨上苦足疾進六甲飛雄丹吞之而瘳復
召問曰卿壽幾何對曰踰七十矣曰卿顏何童邪對曰
亡思亡慮勿撓其氣唯一唯純以守吾真上悅賜蒲萄
酒飲之每賜輒醉醉輒仆地而臥嘗以眞神仙稱之居
八年乞還山中賜以銅簡鐵笛及百衲袍之屬暨還結
八卦庵於琵琶峯石月夜往往出坐磐石上持鐵笛吹
之依稀作鸞鳳鳴二十八年八月呼陳鍊師與之劇飲
曰我明日將死故與子醉別明日叩門無應者力排而
入已側臥而逝矣至正間制贈凝妙靈應眞人宋景濂集
普照姓曾氏名福可泰和人旣長北遊禮澤庵師更名
行滿號南山自是處叢林益有名成宗召見賜賚極厚

賜號佛慧鏡智普照大禪師仁宗朝制授銀青榮祿大
夫司空復命趙孟頫記其功德

林志

天如名惟則永新西亭鄉人幼祝髮入禾山遊虎邱得
中峯宗旨精究禪微禾山僧遣其徒迎之天如曰彼中
自有打鼓人矣遂不歸住姑蘇師子林善詞賦四海名
流靡不重其超詣所著有楞嚴會解淨土或問禪宗語
錄十戒法圖說天如集雲陽李提舉祁臨川危學士素

序之

稽古錄

鐵牛禪師姓王氏名時定吉安泰和人自幼輦血不接
於喉吻年三十一從肯庵勤禪師落髮時雪巖欽公住
宜春之仰山往事之巖上堂云學者工夫七日夜一念
無閒眼不交睫而無入處則老僧爲大妄語師默有所

領內自省究至七日動靜二相不生聞擊木聲豁然大
悟巖連舉公案詰之應答如響巖以衣付之後住衡陽

鄆縣之桃源山

虞集學
古錄

賀氏女釋也永新人嫁同邑江安行有二子既寡不茹
葷日誦圓覺經不少輟或勸更誦他經賀曰要知真性
本圓本覺出此卽非佛義我非專誦經者聊寄心耳後
子楹登第爲賀州僉判迎母至官所賀忽語其婦曰吾
誦經了無夢想近夜常見瑞光中有貌座欲昇之未果
今閉目便見此相矣其歲五月沐浴更衣翌日食罷盥
漱忽收足端坐兩中指結印瞑目而逝郡守范直清率
其屬瞻禮歎曰丈夫不能如此令畫工寫像惟目睛未
點乃禱曰精神全在阿堵中願賜開示俄兩目炯然子

孫扶視皆謂未死頃閒復瞑年七十七矣

豫章書

明

趙元陽名宜真其父仕元爲安福令因家焉幼穎敏習進士業例試入京以病不能赴夢神人曰汝神仙中人何望世貴遂從塵外遊師李元張天全結茅匡山居之於正乙天心雷奧全真還丹之旨多所發揮洪武壬戌正月朔謝眾曰自今閉關以還吾真慎無干焉五月三日夏至啟關漱浴更衣趺坐呼弟子於前書偈畢雷電交飛風雨晦冥乃倏然逝明日縣官士庶觀者雲集以棺殮肢體屈伸顏色如生著有詩詞歌論若干篇其徒甚眾續承道脈者劉淵然一人而已

豫章書

沖虛子姓饒名正道吉水人生有奇相有道士見而異

之曰是子非塵垢中人語其父母攜入崇道觀授以金丹祕要能運精氣書符篆驅役雷霆水旱疾癘有求之者其應如響洪武閒徵爲太常樂舞生會夏久不雨有言之高廟者卽日命建壇神樂觀正道凝神默坐期以三日必雨及期日色如赭俄有雲勃然從東方興雲際閃閃見旌旗狀上隱隱有青雲二大字已而雷電交作雨下如注永樂九年授北京祠祭奉皇太子命修醮於白雲觀凡七晝夜皆有異徵

府志

白雲居武功誦法華經忽覩五色盈空天花亂雨遂大悟杖策峯頂見大蟒蟠石上爲說偈蟒點首而去弟子眞香上山途逢虎見白雲護之虎遁比至白雲方出定山無水禱之井泉湧出胸前有肉眼黑白分明一日珠

自墮侍者持獻公曰非我珠也旋拈瓦礫示曰此是我珠僧臘八十有四忽集眾說偈端坐斂衣而逝著有牧

牛圖說

安志

非空王姓永新人祝髮東山師事無詰謹戒律善詩歌行草有晉人法學士解縉與友善著有翠微集

府志

妙湛不知何許人明宏治間遊東山時值日夕四顧榛莽樵子告以虎穴僧曰吾法復興虎當避不爾食我遂跣趺草上明旦樵子往僧出定邑中轉相驚告施金帛

助築壇場

府志

天真首參五臺孤月又參妙高峯更名明果應羅文恭

請遂爲石蓮洞開山之祖

石蓮洞棲禪志

無學廬陵良家子也常住西峯寺往來酒肆中丐食得

飲輒醉醉則譴呼跳躍遇人詈罵人毆辱之亦不爲動
或以葷腥進告以菜則食雞豬則弗食莫喻其意皆以
爲狂僧也工詩善書見鄒南皋畫像拈筆題曰烈著都
門名噪天下世人見之謂是仗節死義之臣無學視之
仍是水田老者示寂於九江火其骨投之江一夕風雷
大作沙石湧積墳起其處人稱爲無學洲

安志

大然號笑峯江甯人倪姓名嘉慶天啟壬戌進士爲戶
部郎以黨事下刑部七年單拈趙州無字參題事白遂
難染一日整花架花刺著臂驚爲蜂螫覺而大笑遂豁
所疑後印證浪丈人遂受法住青原山有衣鉢塏

安志

大智字無可號藥山愚者桐城人方姓名以智崇禎庚
辰進士授編修國變披髮歷滇黔返棲壽昌師神穎秀

發得法浪丈人住持青原十餘年卒於安福縣埕歸浮

山

安志

國朝

從化字記之又字芝穎萬安劉氏子生三歲識字十歲
祝髮從僧本解授宗旨後住大力庵年餘出山徧遊報
恩天童諸叢林以詩寄蔡文詔曰長途歷徧徒煙水故
國歸來空月明給諫倪嘉慶明亡爲僧主青原一見奇
之曰芝穎梅子熟矣久當脫落置諸弟子易名興化府志
中千廬陵人證道於藥地居泰和亦庵編首山偶集魏
禧爲之序稱其人如衣布食粟

魏叔子文集

曇瑞號竺堂安福劉氏子年十七落髮入廬山聞洞山
觀影語有悟遍參諸方順治十四年入京奏對稱

自歸遊吳興金陵旋還安福重興廬陵崇恩寺後復入京厯主
護國香光寺及大城西方禪院遊五臺聞吉州兵後寺
宇燼盡辭歸重建康熙壬寅九月示寂著有詩集語錄

府志以
上吉安府

晉

王郭二仙顏真卿云爲方平從弟族弟又云同胞雙生
一從父姓一從縣令之姓吳曾云晉時士大夫棲隱巖
壑此或然也至今臨川臨山有集仙觀亦曰仙臨觀因
二仙曾臨其上故名崇仁華蓋山有浮邱先生壇爲二
仙上昇之所浮邱不知年代或曰黃帝時與容成子遊
或曰漢書浮邱伯楚元王申公所從受詩者也晉時由
金華山之華蓋山吐氣成橋度王郭二仙故今崇仁華

蓋並祠之

名勝志

宋

帛道猷生公弟子宋文帝嘗問慧觀頓悟之義誰復習之答以道猷卽敕臨川郡發遣到京延入宮內命猷申述時競辯之徒關責互起猷積思參元往必推鋒帝撫几稱快曰生公孤情絕照猷公直轡獨上可謂克明師匠無忝徽音

續世說

唐 後唐 圻

黃令微臨川人少好道風神卓異天然絕粒年十二度爲天慶觀女道士年八十髮白面紅如處子屢履而行奔馬不及聞魏夫人仙壇在本州求之不得後訪於胡天師超乃得於所居之南二百步烏龜原中姑嘗於想

像閒忽有告曰壇南九曲池汝可開之姑從而獲焉磚砌盡在他日夢有人謂曰井山道場何不修葺遲明入山果獲壇殿餘趾半峯有自然石井深可三尺闊丈餘故名井山姑旣建置精舍時聞仙樂之音環壇數里莫敢樵采人或不潔必遭蛇虎怪異之難有野鹿爲獵人所射姑爲拔箭每至齋時卽銜蓮藕以獻開元元年欲上昇謂弟子曰吾棺不用釘可以絳紗幕之數夕雷電震繞視紗頂孔如雞卵屋穿容人棺中惟有被覆木簡而已弟子奠瓜尋生蔓數尺結實如桃有黎瓊仙者親

覩其事後亦仙去

麻姑仙壇記

吳自宜雲蓋鄉道士

先屬吉州今屬樂安

垂拱中居礪岡以瓦壺

貯丹瘞楓樹下而沒後有雲覆山頂縣令聞於朝命改

鄉爲雲蓋觀爲吳仙後又改觀爲仙遊

撫州府志

宋震臨川人爲彭澤令入修山得梁道士尉文光丹藥

鑑鼎遂以黃冠隱山中仙去

安志

戚姑戚文秀之女師吳元朗年十八乘雲去山有戚井

里人禱雨輒應

安志

陳雲布字宣威開元中舉博學宏詞祿山起兵避地至

郡棲於今宜黃之綿谷能呼龍致雨武宗封通元悟真

先生年百餘歲沐浴而逝子萬匡奉棺以葬至半山棺

開寸許惟存簡履今妙常觀有唐碣存焉

安志

石碧名慧藏宜黃人本以射獵爲務因逐鹿過馬祖庵

前祖乃逆之師問還見鹿過否祖曰汝是何人曰獵者

祖與之詰辨師遂擲弓投祖出家後嘗以弓箭接機

指月

錄

白楊臨川人姓王名仙林元和中出家白楊寺功行動苦歲旱鍤地則泉湧民資灌溉與普澗禪師遊一日聞澗化於長沙卽彈指倚鍤而化推之仆地折齒屍自起立里人投其屍於水三日沂流故處眾異之泥其骨而

祠焉

名勝志

普慧會昌中至宜黃白土寺舍委

府志作婁

遜家問其名不

答曰頗憶由饒州來故人以饒公稱之後坐亡於白土山之水濱上嘗有雲氣遜神之以香泥傳其全身龕於寺之西廂曰饒氏菩薩有禱輒應隆興初郡守張孝祥上其事賜號普慧加封慈應

名勝志

白雲名匡仁住金谿疏山寺號圓照禪師青原行思第

五世洞山良价法嗣也師手握木蛇有僧問手中是什麼師提起曰曹家女遷化時說偈而逝著有四大等頌略華嚴長者論

景德傳燈錄

元證名本寂泉州莆田人姓黃氏行思第五世良价法嗣也於福州靈石山受戒咸通初洞山价坐道場往來請益後密印所解乃辭洞山去住撫州曹山後居荷玉山天復辛酉告寂壽六十有二諡元證大師塔曰福圓

景德傳燈錄

月輪姓許氏福州福唐人也青原行思下夾山善會法嗣初投本郡黃檗山觀禪師稟教及圓戒品謁三峯雖問答有序而機緣靡契尋叩夾山受印依附七年往撫州卜龍濟山隱居元侶雲集師遂演夾山奧旨名聞諸

方後歸臨川樂棲黃山同光二年示寂塔於院西北隅

傳燈錄

證空臨川郭氏

林閒錄
姓江氏

名居遁年十四入嵩嶽爲僧參

翠微德山不悟復謁洞山价遂悟道嘗自寫半身影其
徒贊之曰日出連山月圓當戶不是無身不欲全露同

光元年秋夜有星隕方丈前跌坐而化

安志

紹修青原行思第八世下桂琛法嗣初與法眼同參地
藏後居龍濟山不務聚徒而學者畢至

傳燈錄

宋

饒洞天臨川人爲縣掾淳化中夢神告曰汝心公平名
已動天遂修道有羽士告以宜見譚紫霄訪之數年乃
遇於南豐一日語其徒曰羣仙會綠竹峯余被召遂別

江陰縣志卷之二十一 撫州府
去不知所終

安志

晏穎臨川人丞相元獻第童子時有聲真宗聞之召試翰林院賦八沼瑞蓮賜出身授奉禮郎穎聞報日閉書室高臥不出家人呼之弗應拊鎖就視則已蛻去旁得書一紙云江外三千里人閒十八年此時誰復見一鶴

上遼天

安志

李洞元豐中宜黃鄒極好方士洞往謁之一日乘醉求臥極授以珊瑚枕碎之極愠於色翌日復至索破枕黏以膠復完如故更索酒強極同飲不覺竟日尊未嘗益而酌之不竭夜分乃去極頗怪之復邀同遊曹黃二山極不欲往洞指點壁所畫樓閣叱之戶忽開洞遂躍入不見晝亦不存後二年極卒洞至影堂指其像言曰向

時招公同遊今乃爾邪咄咄久之已而失洞所在

安志

寶月熙豐閒來金谿之白華巖居絕頂持戒誦經猛獸

馴伏客至則遣去李生無咎慕師之風棄儒從之

輿地紀勝

瀉山臨川人聞氏名慕詰翠巖可真法嗣也母夢神僧

授以寶鏡暨生白光照室祝髮於南豐之永安及謁可

真言下大悟真入寂乃往瀉山每粥罷放參常自役作

不眠者四十年紹聖初住智海院哲宗召見延和殿及

示寂書偈曰昨夜三更風雷忽作雲散長空前谿月落

有舍利塔在汴城東

安志

陳遷字德升宜黃人年十六遊金陵以強記聞荆公命

與陸農師徧閱蔣山碑無慮數十及歸錄之不遺一字

越二年因病畱蔣山與勇禪師言下有契勇與偈曰猗

孫兒子太惺惺愛弄千年鬼眼睛不見宰官身說法時
時求我頂頭行卽棄儒歸隱究心禪學作續傳燈錄安志
如璧臨川饒氏子初名節字德操博學能文後之穀城
香巖寺聽智海說法而悟遂落髮陳瑩中與詩云舊時
饒措大今日璧頭陀借問安心法儒禪隔幾何先是師
有詩云閑攜經卷倚松立試問客從何處來因號倚松
道人嘗以詩勸呂紫薇曰向來相許濟時功大似頻伽
餉遠空我已定交木上坐君猶求舊管城公文章不療
百年老世事能排兩頰紅好貸夜窗三十刻羌牀趺坐
究幡風始德操攜一僕往襄鄧閒僕亦竊聽說法日有
開悟遂祝髮名如琳病死好事者爲作舉火疏曰無復
挾書更逐康成之後豈憂成佛不居靈運之先德操所

著有倚松集

宋稗史

無相姓胡名妙明臨川染家子善知識教其面壁靜坐
遂有悟頓能文名公多與之交象山一日請易無相在
座象山問理會得否無相曰三畫未分消息露六爻纔
動錯商量晚年結庵常清觀之西趺坐而化

安志

元

余希聖字岫雲號非非子華蓋山南谷人也年十五學
道於宜黃縣南華山昭福觀後徧歷江漢淮海渡河遊
齊魯燕趙閒兩至華陰入終南太白登武當衡岳羅浮
武夷天台得異人之傳至温州時方旱祈禱不應或往
謁希聖卽日雨霑足亦不見其有所爲也温州先有教
人學道者出妻子破家產乃可希聖曰非道也復爾家

室治爾生產行人道之常而不累於心可也及歸臨川以仙遊山爲王郭二仙求其師浮邱伯所居之破屋居無何信嚮四至殿堂門廡陶甓木石不約而輯瓶粟無儲而坐客常滿江東西高雅之流或道過臨川無不就希聖談者分簞食共食之山下有薄田數畝人助之耕給不給亦不經意希聖未嘗讀書而所言平易雅正故翰林學士吳公嘗問爾之爲學何如以顏子喟然章對始則恍惚難象而卒見卓然自立時至而自化爾至元五年化去年六十未沒時徧與所識書別虞集銘之曰六十而化藏斯邱孰云非仙乃其游微風落月山木秋簞食屢空吁不畱

虞集非非子幽室志

雷思齊字齊賢臨川人出家種湖觀授元教講師嘗注

莊子草廬贈之詩曰鉤探十翼象外意羅絡三倉篇內
文道德五千聯貫密逍遙第一寸銖分此邦何有王元
澤後世豈無楊子雲吾取二書還注我何當商略重云
云所著有空山漫稿

安志

李商弼字良佐臨川人一日有數道人叩門求作白蓮
庵記援筆而就頗歡噉有頃坐逝父母哭之起而慰曰
某兄弟幸多死生命也旣瞑一道人撫其背曰檀越生
好處復瞪目厲聲曰大法本無生滅葬時眾輿出城忽
輕如羽時年二十二揭曼碩作四友詩李其一也

安志

徐困默金谿人敝衣垢面人以徐風子呼之有時獨適
野外大哭人問其故答曰我自有感爾順帝至元元年
元夕拉羣兒觀鐙杭州又更言邵武珠鐙之勝令羣兒

閉目遂覺騰空如飛至則與姻好客其地者盤桓盡興而返二十一年游燕都值大旱朝命禱雨甘澍立降封玉府雷師真人次年沐浴端坐而逝葬龜山祖塋已而有見之郡城者啟壙止空棺存焉府志

孫禪師臨川明水寺僧天歷二年旱鄉民請師禱三日不雨遂積薪自焚雨大作屍不燬漂屍寺前止石巖下

巖乃黃華姑所居異之爲立祠

府志

明

張中字景華臨川人好戴鐵冠初以春秋應舉不第遂放情山水遇異人授以太極數學與人言避兵之方從則吉違則凶歲壬寅明太祖下豫章鄧愈因薦中召至問曰余定豫章兵不血刃市不易肆生民自此蘇息否

曰未也旦夕此地當流血廬舍焚燬殆盡卽鐵柱觀亦
當僅存一殿耳及指揮康泰反一如中言陳友諒圍豫
章三月不解上舉兵伐之召問中對曰五十日內當大
勝亥子之日獲其首領其戰必在南康彭蠡常遇春與
敵戰於康郎山被圍僉謂不可救中曰亥時當出如期
果出友諒中流矢死兩軍皆未覺乃密奏曰友諒死矣
顧其下未知猶爲之力戰請遣死囚持祭文往哭之則
彼氣奪而吾事濟矣上從之降其眾五萬後居都下數
年一日無故自投於大中橋水死命求其屍不獲已而
潼關守奏云某月某日鐵冠道人杖策出關正其投水
日也後建文時復見於金陵歌曰莫逐燕逐燕自高飛
高飛上帝畿遂有靖難之事後不知所終

豫章書

無明裴氏子先是西竺有再來之識師嗣事廩山亦隱

居壽昌道契單傳爲中興洞宗第一

安志

九峯和尚姓袁年二十四出家石鼓庵初不識字軍峯

僧口授以楞嚴心呪六字作務閒持誦不懈年四十建

疾幾殆忽甦遂偈說疊疊皆成妙義時天齊幽隱彭山

師往證之契若水乳年七十作偈更衣而逝塋於庵右

安志以

上撫州府

漢

麻姑不知何人曾得道於此故山以麻姑名有仙壇

謝志

謹案麻姑始見於神仙傳舊志定爲漢人者以與王遠蔡經同時言之耳

唐 南唐 增

鄧思瓘號紫陽臨川人開元中應召使神兵以卻西戎

雷霆隱見帝神之二十七年感虎駕雲車而化帝作輓
詩遣中使送輓還麻姑山後改葬棺中惟玉簡香鑪而

已名勝志

鄧德成思瓘從子元宗奇其穎異授以巾笏曰他日爲
教主後石堡爲邊患召至禁中然鐙告斗焚香冥祝一
鐙飛去若流星而石堡城中正以此夜灰燼云雲溪友議

伍之奇有道術卓杖成泉名參龍池安志

饒廷直南城人第進士嘗過武昌游黃鶴樓遇異人授
以祕訣自是不邇妻妾脩然端居後爲鄧州通判卒其

柩還鄉舁者覺甚輕蓋尸解云明一統志

上宏紀禪師姓饒氏大厯中肄業景雲寺與婁相國輔
刺史顏真卿本道廉史楊憑韋丹友善講四分律坐甘

露壇度男女萬餘人

安志

崇儼得法於石霜楚圓和尚住太平禪院升堂日會者

萬計據牀安坐如鐘鳴如谷響重昏宿霧冰解雪釋

李觀

太平寺記

謝禪師天祐二年自閩中來開山於南豐縣東覺源寺

一日以兩缸相合坐化屬小師於七日後開缸先二日

開之禪師即步入化城寺跣趺而逝塋在寺洞中

名勝志

桂琛常山人事無相大師披髮受戒已乃曰持戒僅律

身而已非真解脫也於是訪雲居雪峯參訊勤恪猶未

有所見後造元沙一語啟發豁爾無惑由泉南山雲居

至石碇見其峯巒幽邃遂開闢焉建院爲永居即今壽

昌

府志

張洞宣貴溪人精通道術昇元初自龍虎山來南豐石
仙巖巖爲軍山神所棲洞宣聚石爲壇作石室方廣二
十丈修煉其中先是巖前飛石擲人人不敢近洞宣篆
符於石壁上患頓息後委蛻葬於山腹

府志

宋

冷真人寄迹張洞宣冲寂觀內一日與縣尉王博文別
乃坐蛻於巖前樟樹穴中其貌如生

名勝志

王侍宸文卿字安道宣和初遇異人授五雷法揚州旱
詔求雨文卿仗劍噴水曰借黃河水三尺後揚州奏得
雨水皆黃濁自書棺曰此身是假松板非真牢籠俗眼
跳出紅塵書畢臥棺中是夕風雷交作厥明已解化矣

景泰
郡志

毛道人南城人少不娶父母既終遠遊三十年還家寡言笑夜坐伸欠光自口出慶元元年坐亡於南豐逆旅焚時骨連環不斷有物如錢大色白如玉雪堅而瑩隱然通明有人影跣趺而坐

夷堅志

有誠字無妄住南城崇聖寺中最善講華嚴經治平中自南城赴張安道之請講於東都左街萬歲院後住東

都覺嚴寺厯席最久

林間錄

景祥姓傅氏南城人永新令翼之子少警敏嗜學廣記道人有琦者說法靈鷲祥往聽之乃悟削髮參禮名師受戒後進明湘真如法席心法益明四方迎請俱不受建炎末避地天台不得已從閩帥大吉山之請行未越境爲范丞相挽留奏居淨山久之出其古衲並書付其

嗣法昇跣跌而逝得五色舍利目睛齒舌皆不壞及素

珠存焉

涪熙郡志

明

胡古厓新城人仁宗鎮南畿時徵至命禱旱應時而雷雨作嘗建醮羣鶴繞壇上異之欲受其術乃以清虛非王者事對後北迎嗣統欲與俱行懇乞歸命主武當山賜袍笏兼賜詩曰三島千年客四海一閑人殘藥活雞犬靈香出鳳麟飢餐石中髓困臥天邊雲逍遙玉清境榮遷金簡文月白風清夜相期泛蓬瀛

安志

大腹子萬曆乙亥丙子嘗遊吁乞食城市言人禍福多中所乞錢米隨手轉施羅近溪禮敬之後不知所終

安志

行保南城人幼慕禪教入慈真院爲僧戒行老成言訥

心明洪武中住持演法寺又住持天甯寺大振宗風叢
林歸之後舉天下高僧十一人行保與焉永樂初無疾

端坐而逝

明一
統志

孤月居廣信月峯山後移錫從姑山欲返山中道經頂
山寺隨者百餘人邀入寺談法乃沐浴更衣作偈示眾
頌畢竟寂時眾見烈燄中異光一道上偪斗牛閒於瓦
盆中得舍利一顆精光煥然弟子無像通儒術著有聖
門心學一卷益藩召住章山寺無名無來俱南城人爲

叢林推抑

府
志

大成號竺庵七歲能詩初薙髮南嶽閑關十年禪理大
悟卽參博山又十年駐錫棲霞金陵士大夫多重之聞
壽昌火中夜披緇衣起慨然曰此我禪道場也可令心

鐙不續晨鐘暮鼓竟爾絕響乎遂草履跋涉至壽昌與
邵來沙募貲重建運甓踏泥津新堂構著有會聖堂集
指據錄及攝山南嶽諸藁

府志

圓智姓李名珙字共玉明諸生國變後棄青衿依廣濟
爲弟子痛通濟橋壞矢募建日立大有關前向人稱說
布施功德人爭踴躍投錢夜則與寺僧共論宗乘所存
雜著一帙大約依於忠孝

府志

埋庵和尚住周坡廣遠庵工詩有埋庵集後遊普陀示

寂南海

府志以
上建昌府

漢 吳埶

張道陵字輔漢留侯九世孫也

太平廣記
作六世

母夢神人自

北斗魁星中降授以香草曰薜薇也既覺衣服居室皆

有異香感而有娠建武十一年甲午正月十五日生於吳之天目山旣冠身長九尺二寸龐眉廣額朱頂綠睛目三角戟髭髯伏犀貫腦玉枕峯起垂手過膝龍踞虎步見者凜然博習羣書兼明占候從學者千餘人永平二年中直言極諫科拜巴部江州令棄官隱洛陽北邙山修煉形術章帝以博士徵和帝召爲太傅封冀侯俱不就杖策游淮入鄱陽上龍虎山合九天神丹訪西仙源獲制命五嶽攝召萬靈及神虎祕文於壁魯洞復往嵩山石室得黃帝九鼎書及道成聞巴蜀沴氣爲害遂入蜀初居陽平山遷鶴鳴山感太上降授正一明威祕籙及三天玉冊太上爲度師封道陵爲天師並授三五斬邪雌雄劒陽平治都功玉印印之爲異者累紙百幅

丹文必徹於是分形示化立二十四治增以四治以應二十八宿妖厲爲之衰熄桓帝永壽二年遷渠亭山出經籙印劔授嗣天師衡使世世相傳乃於南隆雲臺峯乘雲上昇世壽一百二十三歲是爲漢天師第一世子衡嗣教居陽平山衡子魯以道術治人領漢甯太守後歸魏拜鎮南將軍封閭中侯薨諡原侯以經籙印劔授

子盛嗣教

府志

葛元字孝先其先瑯琊人生於延熹中

舊志誤延禧並不著某年或某

甲子而繫其生日爲四月八日非法也

八歲失怙能自卓立十三通古今

學念世有長生不死之道因遁跡靈嶽求異人入天台赤城上虞山遇真人左元授以九丹金液仙經煉氣保形之術行持三年化遷無方赤烏七年八月望日於葛

仙山上昇凡修煉之地二十二處鉛山其一也今弋陽

縣葛溪有葛仙冢

白志

張盛字元宗漢天師曾孫初嗣教居南鄭魏太祖封都亭侯不受以父魯嘗訓之曰龍虎山祖師元壇在焉其地天星照應地氣沖凝神人所都丹竈祕文藏諸巖洞汝宜往宣吾化修煉累功遂攜劒印經錄自漢中還郡陽入山得祖師元壇丹竈故址卽地爲居以三元日登壇傳錄四方學道者日眾遂以劒印付子昭成旣示化不踰年復於廣西賀州爲廣王說法嘗謂人曰西蜀鶴鳴東吳龍虎功行旣成再遊南土

府志

晉

王表貴溪人元康初修煉於巖中久之太極真人降授

以三五飛步之訣晉太和二年正月七日上昇香霧集
空下聞仙樂丹井飛昇臺至今尚存世名其巖爲王表

巖安志

張昭成字道融盛子漢天師第五世每端坐石室出神
數百里虎豹皆伏暨化去或見騎鶴遊空中啟冢驗之
惟冠履留耳子椒博通羣書晉安帝屢徵不起椒子回
五歲欲學經籙父曰且讀儒書對曰祖書不讀讀他書
何爲嗣教後辟穀日行數百里入青城山不知所終回
子迴迴子符府志

隋

張子祥字麟伯符子漢天師第十世仕隋爲洛陽令棄
官襲教嘗吐丹掌中光芒透屋尋復吞之子祥子通元

歲大疫以標植水中汲飲者咸愈

府志

唐 南唐圻

張恆字德潤通元子漢天師第十二世唐高宗問治國對曰能無爲則天下治矣上嘉之尤善幻術自言吾神仙之狡獪者嘗置甕室中對妻子茹葷飲酒及發甕皆在甕中經日不壞恆子光光子慈正

府志

張高字士龍慈正子漢天師第十五世道宇超曠好酒縱飲一石不醉嘗忘玉印長安酒家諸少年力舉之不能動明日高笑而攜去高子應韶應韶子頤字中孚至孝侍母疾經旬月不解帶嘗曰人不忠孝而希仙道是舍舟楫而涉大川也

府志

張士元字仲良頤子漢天師第十八世瘠而多髯居應

天山四十年山多虎人莫敢謁每風雨中遙見乘黑虎

往來諸峯閒士元子修修子謹

府志

慧覺大義禪師住鷺湖寺元和二年詔入麟德殿設齋
召諸大德論道帝臨聽論議有一法師問如何是四諦
師云聖上一帝三帝何在又問欲界無禪禪居色界此
土憑何而至師云法師只知欲界無禪不知禪界無欲
法師云如何是禪師以指點空法師無對復有數人致
對者師皆乘機爲曉之帝問曰何者是佛性師曰不離
陛下所問帝默契由是益重禪宗師爲衢州徐氏子嗣
馬祖元和十三年正月入寂敕諡慧覺禪師

傳燈錄

道和住貴溪天柱山章法院下初結草庵後代遂爲精

藍乾甯中名西林院宋治平賜額

名勝志

智孚福州人始依講師後造雪峯既領心訣至鷺湖大

張法席爲義存法嗣

景德傳燈錄

新羅僧新羅國人慕大義之風造焉至則已寂歎曰本爲法來師亡法亦何在遂投崖死數日後異香滿谷乳泉流出其徒卽之乃端坐崖下身體不傷懷中偈云三千里路禮師顏師已歸真塋已闕鬼神哭泣嗟無主空山只見水潺潺遂固以香泥祠之大義傍建亭捨身崖

畔曰臨深

安志

法政姓吳閩人壯歲爲車盤鋪卒以持誦作方便後爲僧居雲巖下有怪物若怒其來逞威欲齧之使去法政兀坐持梵音晝夜不絕漸乃馴伏稍久遂與立誓分界而處焉翦除蔽穢經營坐臥之所居十五年有施水活

病之功臨化徧辭檀越有頌

安志

張秉一字溫甫謚子漢天師第二十一世日光如電夜能視物嘗負劒行山澤閒叱一老樹雷卽震裂擊死二巨蟒及小蛇百餘秉一子善善子季文

府志

宋

張正隨字寶神季文子漢天師第二十四世性質直敦朴不與俗接大中祥符八年真宗召至闕賜號真靜先生子乾曜字元光端靜寡言天聖八年仁宗召問冲舉之事對曰此非所以輔政教也陛下誠能返之朴行以簡易則天下和平矣奚事冲舉哉上嘉之賜號澄素先生乾曜子嗣宗賜號虛白先生嗣宗子象中生五月能言七歲朝京師賜紫衣象中子敦復神宗賜號葆光先

生敦復無子以從子景端嗣徽宗大觀二年贈號葆真

先生

謝志

張繼先字嘉聞景端之從子

謝志誤從弟

漢天師第三十世

也元祐七年壬申十月三十日生五歲不言聞雞鳴忽笑賦詩云靈雞有五德冠距不離身五更張大口喚醒夢中人眾異之九歲嗣教崇甯初解州鹽水溢遣使召見書鐵符投之怒霆磔蛟死於水時年十二歲上問卿居龍虎山曾見龍虎否對曰居山虎則常見今日方覩龍顏上悅侍入寢殿宮人競求書扇各以經語書皆密契其意中舉一握稽首書曰保鎮國祚與天長存乃上所御也益奇之後祛妖禱雨立應授太虛大夫辭乃命江東漕臣卽山中度地遷建上清觀改爲上清正一宮

賜虛靖先生號上問道法同異對曰道本無爲而無不爲體卽道也用卽法也體用一源本無同異若一者不立二者強名何同異之有上曰然後因建醮內庭密奏赤馬紅羊之兆懇請修德靖康丙午汴京偪亟召行至泗州天慶觀索筆寫頌隱几而化葬龜山之麓後十六年西河薩守堅遊青城山遇之峽口授以符法及水調歌一闕以書一函赤鳥一隻令達嗣天師守堅歸告大驚遣發泗州寔惟一鳥存後又有遇於武夷羅浮者虛靖不娶無子示化泗州時以印劔經錄付象中之孫時修辭曰虛靖吾從子也吾何後之眾曰法統所在孰得而辭遂嗣教是爲漢天師三十一世

府志

徐若渾字居明政和閒林靈素講道寶籙宮士大夫咸

會靈素蔓衍徐越次起曰傾河之辨必貴當於理終日不言亦貴會於道林曰子所學者何道徐曰孝於親忠於君居仁由義調喜怒正好惡安時處順樂天知命如是而已不知先生欲進以何道林高談曰此道乃教主道君之道子何以揚之徐進曰皇帝方以道莅天下欲還萬姓之淳復一世之樸故俾先生以道開羣聽今參侍講席貴賤大小咸願聞教朱審先生以何道使仁者見其仁智者見其智賢者識其大不賢者識其小虛而往實而歸性與性相傳心與心皆得上異之宣問肯爲道士否徐對親老無兼侍乞歸山詔授將仕郎祠廟差遣終父喪不仕惟出入漁樵寓興詩酒隱玉虛之西嘗攜一布囊入市令羣兒探錢隨取隨有又嘗戲言欲入

壁中已而果入壁不知所終

安志

詹大順字德常太霞宮道士劉正夫微時詹嘗爲其先卜兆曰十八年後子孫當居宰輔及驗劉爲上言之政和七年詔赴闕固辭劉復裏糧促之乃赴召授沖虛法師視朝散大夫陽德觀住持凡五賜對重和元年授元素大夫請還山詔知鴻都觀建炎三年羽化壽八十五

安志

王道堅貴溪人政和閒館於太乙宮徽宗訪以修煉之術奏曰清靜無爲軒黃所以致治多欲求仙漢武所以罔功修煉非天子之事授太素大夫號凝妙感通法師時徽宗知國當有厄命禳之對曰修德可以回天禳禳之說不敢誤國後歷請還山紹興初高宗遣使召見朱

一日鳴鼓集眾舉頌曰無心曾出岫倦翮早知還爲報
長安使休尋海上山比敕使至已化矣

安志

祝永祐貴溪人與王太素齊名政和閒號沖隱大師知
本州神霄宮時盜掠衢婺二州將及信境郡守懼祝曰
公無憂盜踰常山當自退頃之盜至草莽大風晝晦若
有旌旛戈甲出沒山谷間乃宵遁郡守以聞加號通妙
後復徵之歎曰太素公且將歸矣吾何往爲稱疾不赴

卒年九十一

安志

呂生隱於丐或言海州人其來永豐甚久父老皆謂童
稚識之莫記甲子顏貌如初一衲被體寒暑不易無穢
惡氣邑西有廢祠瓦蓋不完生席地而處數十年祠壞
乃止真隱觀人知之又止縣市道室中邑人蔡氏舍之

荒園陳尙書天祐謫居於信禮謁之生遙見亟走林莽
閒解衣固辭贈千錢亦不受忽自書死日乃淳熙丙申
一月癸卯也用薪燼書偈而死人以一席卷之埋於山
下生死後二年蔡氏子押戍至汴日暮相遇道生平歎
蔡以囊竭告生贈以草履令瞑目曰吾送汝歸漏三下
遂抵家縣令異之發其冢見席化爲畫酷肖呂形其草
履化雙鶴飛去畫藏真隱觀太守金銳作圖記之建來
鶴亭於原墓

府志

張守真字遵一時修子漢天師三十二世母吳氏娠十
九月而生毘陵有妖憑樹詔劾之一夜風雷拔去後江
濤衝決復定之賜號正應先生子景淵景淵子慶先慶
先無子以從子可大嗣字子賢漢天師三十五世也鄱

陽水漲壞廬舍提刑袁甫請治可大以符投湖雷殛大白蛇水遂平嘉熙中投符錢塘潮決立退蔡醮太乙雨作蝗殪賜號觀妙先生敕提舉三山符籙兼御前諸宮觀教門公事主領龍翔宮時當宋季元世祖聞其神異密遣使訊之可大授以靈詮謂使人曰善事爾主後二十年當混一天下逮至元十三年乃宋恭帝之德祐二

年果驗

府志

德韶處州龍泉陳氏子母葉夢白光觸體覺而娠年十五有梵僧拊其背曰塵中無置汝所也乃依龍歸寺薙髮十八詣信州開元寺受滿分戒謁投子庵主不契造龍牙遁禪師參問猶惘然後於佛眼座下大悟開寶四年集眾告別而化六祖下第十世

揭月錄

自清居信州大山寺性疏狂屢被師責一日謂師曰弟子欲往京師見天子願假一乘師怒曰糞箕扛汝自清卽成一偈辭去忽一日乘傳歸奉敕重葺山門賜號雲風和尚

豫章書

慧日六祖下第十四世自機契雲居熟遊湘漢暨歸永豐或處巖谷或居鄜市令鄉民稱邱師伯凡有問以莫曉答之忽語人曰吾明日行腳去汝等可來相送於是黠賂者畢集師笑不已眾問其故卽書偈擲筆而逝指月錄

劉中宮貴溪人結茅厓山居民苦旱向之乞雨輒應嘗謁撫州守書刺曰叅龍僧守惡其幻詰之曰龍安在師曰明公勿驚以金盤盛水探懷中若朽草置水中風雨

大至龍躍而去

危太模集

元

張宗演字世傳可大子漢天師三十六世元世祖混一天下憶其父言有驗遣詔徵之賜靈應沖和真人之號賜玉冠玉圭給二品銀印主江南道教事子與棣賜號體元宏道廣教真人

府志

張留孫貴溪人少爲龍虎山道士有相者曰神仙宰相也世祖時從天師張宗演入朝留侍闕下世祖親祀幄殿風雨暴作留孫禱之立止授元教宗師居崇真宮因論至道清淨之旨深契上衷加號大宗師武宗時爲大

真人

安志

張與材字國梁宗演次子漢天師三十八世既精道法

兼優詩文成宗授太素凝神廣道大真人大德二年海
鹽鹽官兩川潮溢沙岸百里蝕齧與材奉詔投鐵符河
圯處符躍出者三雷電晦冥磔怪物魚首龜身其長丈
餘隄復故常五年冬無雪上憂之與材建壇以禱夜雪
盈尺上喜賜酒曰卿能感神一至此邪錄平潮功加授
正一教主兼領三山符籙給銀印視一品九年崇明州
海隄壞俾弟子持符往効之民夢有神填海者遂安武
宗加賜寶冠金服制授金紫光祿大夫封留國公子嗣
成爲第三十九世仁宗賜號太元輔化體仁應道大真
人嗣成卒弟嗣德爲第四十世嗣德卒子正言爲第四

十一世

府志

明

張正常字仲紀嗣成子漢天師四十二世嗣成嘗夢神人自華蓋山來及覺而正常生穎異敦厚目光燭人嗣成將遊五嶽指相傳印劔曰龍星再集於亥吾兒當持此大振元風迨至正己亥果襲教明太祖既起正常遣上牋陳天命有歸之符洪武初制授正一嗣教護國闕祖通誠崇道宏德大真人給銀印視二品褒文稱其瞳樞電轉法貌昂然蓋歷世相傳以眼圖而鉅爲神應故上及之士庶求符不能徧給篆符投井人爭汲之病者皆瘳上欲通誠天帝致齋三日袞冕親署御名手授真人俾祝而焚之復召問鬼神情狀三十年敕代祠嵩山禮成而歸置酒酣飲忽慨歎曰五岳名山先子欲遊而弗遂嵩山爲吾祖得太清丹經之所今藉聖主威靈幸

一至馬嘯曦景於層霄邈浮埃於浩劫吾志有在矣未
幾示微疾端坐以印劔授其子宇初默然而化上親製
文弔祭之

府志

張宇初字子璿正常子漢天師四十三世目秀雙瞳面
交二斗五歲讀書十行並下有異人見之曰是列仙之
儒異日大張斯教者也嘗侍父登樓見西北五色雲起
金扉洞開天神護衛鎧仗森列父戒勿泄以家祕授之
易了試之輒神洪武十一年髫髻襲教入見奉天殿上
熟視笑曰絕類乃父眷賚有加授正一嗣教道合無爲
闡祖光範大真人十八年禱雨於神樂觀隨應永樂中
建玉籙大齋有慶雲覆壇鸞鶴交舞之瑞一日以印劔
授其弟宇清書頌曰一點靈明本無生滅五十年中非

圓非缺今朝裂破大虛空三界十方俱透徹舉手向前
指而逝著有峴泉文集二十四卷四十四世字清號西
壁宣德初加封正一嗣教清虛沖素光祖演道崇謙守
靜洞元大真人四十五世懋承正常之孫字初字清從
子誥授正一嗣教崇修至道葆素演法大真人四十六
世元吉懋承之孫正統天順閒加封正一嗣教體元崇
默悟法通真闡道宏化輔德佑聖妙應大真人四十七
世元慶成化閒誥授正一嗣教保和養素繼祖守道大
真人四十八世彥頤嘉靖閒誥授正一嗣教懷元抱真
養素守默葆光履和致虛沖靜承先宏化大真人四十
九世永緒明世宗御定名誥授正一嗣教守元養素遵
範崇道大真人五十世國祥萬曆丁丑襲教誥授正一

嗣教凝誠至道闡元宏教大真人贈太子少保五十一
世顯庸天啟丙寅襲教誥授正一嗣教光揚祖範沖和

清素大真人贈太子少保

府志

王德彰鉛山王真之胞弟幼慕神仙受月孛星傳手掌
文現風雲雷雨四字祈禱無不應後坐化於禪靜院

府志

邵元節貴溪上清宮道士師范文泰李伯芳黃太初咸
盡其術宸濠召之不往放浪江湖間嘉靖三年徵入京
祈雨有驗封真人統轄朝天顯靈靈濟三宮總領道教
錫金玉銀象印各一有事南郊命分獻風雲雷雨壇賜
紫衣玉帶敕建府城西歲給祿百石以校尉四十人供
灑掃賜莊田三十頃蠲其租又遣建道院於貴溪賜名
仙源宮乞還山舟至潞河命中官迎入賜蟒服及闡教

輔國玉印先是皇嗣未建數命元節建醮文武大臣日再上香越三年皇子疊生帝大喜加恩拜禮部尙書賜一品服卒贈少師賜祭十壇遣中官錦衣護喪還有司營葬用伯爵禮禮部擬諡榮靖不稱旨再擬文康遂兼用之曰文康榮靖

白志

無異諱大穢舒城沙氏子母姚生師卽不得食酒肉七月母死他人婦乳之皆不食乃以榛栗飼不死年十六出家禮五臺通法師修智者止觀之道嘗露坐松下五年詣超華受比丘律謁壽昌於鷲峯後居信州西巖四十餘日祖印院七月乃遷博山禪律並行閱三十年有星大如盤竇方丈鷗吻師中夜召首座智闇反覆宗乘相與大笑遂示疾首座曰和尚去來自在云何師索筆

大書歷歷分明四字而逝

安志

智闇號雪關上饒傅崇儉子參博山究船子藏身公案
偶入槽廠見磨鼻拽脫有省呈偈於博山博山曰據子
見地天下人把不住我卻不肯點頭乃掩關謝客懸鏡
反參作雪關歌呈博山始可之後受瀛山請居無何博
山遷化往來瀛博閒曹觀察請住鼓山再興湖墅佛事
莊嚴師曰吾今可以謝喻彌陀矣至瀛山微笑而逝

安志

廣心號養庵上饒人姓鄭氏居家聞客談含生皆有佛
性義言下洞然遂出世禮翠峯祝髮至焦山夜半聞江
中樵船聲豁然開悟乃謁華山真定定以雲門六不收
公案驗之當下脫然定可之而示以偈歸信州住靈山
中臺旋上峯頂見大義舊趾斬草重興用無縫鎖一挂

法堂露柱上榜曰上古流傳鎖憑君智慧開若無開鎖法相見不須來壽八十一塔於本山唐帽峯

安志

國朝

張應京字羽宸顯庸子漢天師五十二世少澄心秘典忽若有省曰瓊花現幻味徧人問何語笑不答明季嗣教順治初入京

世祖召見嘉賞

賜銀印給驛券還山至揚州瓊花觀忽沐浴更衣北向再拜端

坐而逝人始悟瓊花之讖子洪任襲正一嗣教大真人

是爲五十三世

府志

張繼宗字善述洪任子漢天師五十四世

聖祖賜額碧城遂以爲號以祈雨立應

賜貂帽鞍馬又隨

觀法員吳士行等三員留京供事遂爲故事繼宗奉

旨進香五岳在道治黃州白羊妖又治太湖洞庭山赤猴鐵鎖

二怪多靈異之驗嘗挈嗣子錫麟賀

萬壽建醮祝延

賜乾坤玉劒朝珠發帑金修龍虎山廟宇後再入京先期與家人爲永訣語行至瓊花觀瞿然曰此先大夫蟬蛻處也沐浴整巾端坐召畫師寫真再寫不愜復寫瞪視笑曰幻影大都如是隨以印劒付子錫麟曰好爲之吾今得逍遙於無何有之鄉矣聞空中鼓樂聲遂坐化錫麟字仁趾旣襲世封嘗率弟慶麟昭麟入

觀道病手取祖傳印劒付弟曰吾家世受

國恩汝等慎爲攝理勿墜家聲遂逝是爲漢天師五十五

世子遇隆幼慶麟攝理教事

府志

張遇隆字靈谷漢天師五十六世乾隆七年承襲

御賜教演宗傳匾額朝服文綺入

觀賜山莊避暑詩集

聖駕南巡召見賞賚有加會爲御史所劾降正五品旋卒子存

義年十四承襲以祈雨晉秩正三品

賜真靈福地匾額老子繡像

御書法經

上諭嗣後正一真人朝覲並隨帶法官准其馳驛以祈雪立應
賜道冠法衣卒無子遺命以從叔父起隆承襲起隆昭麟之子
也爲漢天師五十八世子鉅襲入

觀拜

賜無算是爲漢天師五十九世銓卒子培源襲是爲六十世

府志

婁近垣字三臣少入龍虎山爲道士先是上清宮有提點周太經者明習五雷正法諸家符祕近垣師事之盡得其傳嘗留京師禮斗祈雨輒應授四品提點封妙正

真人

府志 謹案浙江嘉興府志近垣秀水人

舒懷德饒之德興人貌清癯冬夏一單衣不洗沐身無垢膩善指畫又能撕五色紙爲人物盡態極妍與之錢輒瘞諸土羣兒隨掘之則爲犬矢療疫輒愈晝往來城市夜則蹲踞肆門或赤身臥霜雪久之不知所往

府志

覺浪名道盛別號浪丈人柘浦張氏子幼習舉業因大父坐亡疑此箇靈明往何處去偶於街次聞猫墜聲有

省後因瑞巖識公過浦遂密求薤棲夢華山參博山繼
參壽昌經書林見東苑鏡一病瀕死苑調藥療之有閒
苑究其生平大驚曰吾壽昌這枝慧鎧屬子矣因付源
流順治閒請住博山後至天界毘盧閣休夏忽命移錫
禪堂亭午書偈擲筆而逝有語錄著作五十二種

府志

栗如名宏瀚永豐余氏子年二十一棄家爲僧師事博
山礪順治乙未浪丈人主博山目爲法門聖箭己酉太
守高夢說請主席本山甲寅耿精忠變起僞將汪文生
欲使易服從戎栗如作書卻之云休心息念已三十年
有蒙存注強以攘臂豈仁人君子所爲哉若爲著袈裟
壞法門則雖節節支解決不肯也前汪某致言以一字
絕之今必相勸勉一鉢五湖何所非寓博山祖席任紹

鑪煙而已書達遂止見其兵騎往來曉以慈心善口靡

不攝服信州士民依山避難不下數萬皆得保全

府志

紹燈名上明閩汀吳氏子少遵母雷氏命雪父讐後棄

儒投聖水華林省超和尚出家一日問曰某甲出世已

遲天下名山前哲開創已盡超曰猶有待者此去有座

道場前後四十里無人接待後詣雲居晦明受具復參

載一日泊舟常山定中間異樂遙奏如遊白雲松隲

之間黎明陸行四十里至玉山界緣林澗而入見泉石

奇勝宛如定中忽憶華林之讖遂訪其主募地建寺名

曰白雲再詣載一得授記蒞康熙庚戌始開山焉四十

年九月索筆書偈坐逝有語錄詩集

府志

德閔字天鑑福建甯化人紹燈法嗣康熙間

聖祖南巡詣清江浦接駕

御試龍出曉堂雲詩

召見於揚州

賜額證因歸玉山府志

剖雲名傳鵬臨汀鄒氏子嘗參博山粟和尚粟勉究高
峯睡中主話一日堂中坐香維那揭簾作聲瞥然如釋
重負趨質粟曰一向被瞞不少粟曰試道道看師拂袖
便行粟曰是不是師以手掩粟口粟曰今日始知吾
不汝欺也粟再住博山立師首眾兼監院後退逸本山
獅子堂命師繼席凡五主道場座下常五千指府志以上廣信府

江西通志卷一百七十九